

## 1 Bèe Isrèl a ce kù' à ngòṅ Ijìp sê

<sup>1</sup> Cena a mlii boo vi Isrèl ce a Jakòp, ce a wowèe a m dù à to' Ijìp, ṅwè ba yi mbùundap. <sup>2</sup> Boo anà à m ba Rubèn ba Simiyòn ba Levi ba Judà, <sup>3</sup> ba Ìsakà ba Sebulòn, ba Benjamèn, <sup>4</sup> ba Dăn ba Naftalè ba Gad ker ba Ashèr. <sup>5</sup> Dgù Jakòp wɛɛwɛ nè Josèf ce e m ba yi à to' Ijìp—ṅwè a m ba bèe mnsàambâ<sup>a</sup>.

<sup>6</sup> Josèf a bɔr vi wɛɛwɛ ker ba ṅgù bèe anà wɛɛwɛ a lo a kwɛnger. <sup>7</sup> Geewa'a, bèe Isrèl a m ce bi ku' boo, a ba gòr sê, a ce yaa, a tɔr ṅger sê. Awɛ, ṅgòṅ anà yi ruu nè wowèe.

### Ferò à m ce nyù' bèe Isrèl

<sup>8</sup> À ka' lò ba à nfè' mò', ṅkɔɔ mò' à ko' kɔɔ à to' Ijìp ce e m riṅ Josèf ka'. <sup>9</sup> Dkɔɔ anà à laa nè yi bèe enê, “Yê nè, bèe Isrèl a yu gòr sê, a ce tap ce caa sèe. <sup>10</sup> Sèe ghoo ntaṅ enje nji nje nji kùu wowèe fà di' wowèe a lo yaa, tɛ bìr ka' ke' nàa wowèe a bo tar cùu a yisèe ṅgãa bbàa, rè sèe caṅse fause e à ṅgòṅ ca ka'.”

<sup>11</sup> Awɛ, wowèe a lɛ ṅgãa ṅgàpshi mfà' a wap mbùu ene a fa wowèe ṅge' nè mfà' mntatap. Wowèe a m ba're rla' Pitòm ba rla' Ramsès nè Ferò ce ṅkɔɔ e à to' Ijìp, e ce ber byee àfo. <sup>12</sup> Geewa'a, àmbò a m ce nyù' wowèe gòr nà, wowèe a ce yaa yaa a ce dàa à ṅgòṅ. Yi ka' ba wa'a, bèe Ijìp a ke' a ce wɛp bèe Isrèl sê. <sup>13</sup> Awɛ, wowèe a misi a jar nè bèe Isrèl, a gee wowèe a ce fà' à bkwàa. <sup>14</sup> A gee lap rcu li ba nè mlù—ṅwè à mfà' mntatap. A m ce top ncà' ce boo nshe, a ce gèe mfà' jɛɛ jɛɛ jɛɛ à mṅkù. Mfà' ce wowèe a m ce fà' wɛwɛɛ, bèe Ijìp a m ce jar nè wowèe a gee wowèe a ce fà' à bkwàa.

<sup>15</sup> Awɛ, ṅkɔɔ e à to' Ijìp à lo a laa nè mmakoo bèe Hibrù ce mò' à m ba Shefrà mò' à ba Puwà enê, <sup>16</sup> “Ka' ba mbe nfè' ce wèe ce bisi bbyèṅge bèe Hibrù ye mbe nfè' ce wowèe a ce bi, ka' ba ene yu muu mbaṅrù, wèe yû, geewa'a ka' ba ene a muunje, wèe ma'shì ntèe.” <sup>17</sup> Geewa'a, mmakoo anà a m ce wɛp Nyù, a ke' gee yuu ce ṅkɔɔ à to' Ijìp à m làa nà ka', a ma'shì boo mmbaṅrù btèe.

<sup>18</sup> Awɛ, ṅkɔɔ e à to' Ijìp à toy mmakoo a bipshi nè wowèe enê, “Wèe ce gèe ba ke wa'a? Wèe ce ma'shì boo mmbaṅrù btèe njokɛ?”

<sup>19</sup> Mmakoo anà a beesi nè Ferò enê, “Yi yu wa'a njobè' bbyèṅge bèe Hibrù a yu àmbò bbyèṅge bèe Ijìp ka'. Wowèe a tapṅger sê, a lò bi boo tɛ makoo ka' vù.”

<sup>a</sup>1:5 Mṅwà' mo' elùṅgòṅ vi ce làa yap ene bèe ncòp—ta—à—mnsàambâ (75) fye' mbe ṅwà' Mfà' Dgãa Ntuu Jisòs 7:14

<sup>20</sup> Awè, Nyà à gee bònboŋ nè mmakoo. Bèè Isrèl a yaa, a tɔr ŋger sê. <sup>21</sup> À ka' ba njobè' mmakoo anà a m ce wɛp Nyà, e fa wowèè mmbùundap wap.

<sup>22</sup> Awɛ, Fɛrò à caasi rsa' nè yì bèè wɛɛwɛ enê, “Ɖwè Hibrù ka' bi muu mbaŋrù, wèè ma' njep Rdip Nâi, geewa'a, ka' ba muunje, wèè ma'shì ntèe.”

# ƆWÀ' RFUU

## 2 Rbi Musis

<sup>1</sup> À m ba mbe nfè' anà, ñwè mò' embe mbùundàp Levi à du a lor ñgwa yì embe ndap mò' embe mbùundap anà. <sup>2</sup> Njeñwè anà à lo a koo rbù, a bi muu mbanrù. E ka' ye ene muu anà bòn sê, a suti ye à mñwée btaar. <sup>3</sup> E lo a ye ene àde' e ker suti muu anà ka', a lor ñkàa ce a m ba' nè njeè bgan mo', a yo' nè nlàadoñ, a siñ nè nrèe. E m lè muu njeñ ñkàa anà, a le njeñ mù mñjée àwàa rò. <sup>4</sup> Njar<sup>b</sup> muu anà à m tée à ñjìsàp te e bo ye yuu ce yi be koni nè muu anà.

<sup>5</sup> Muu Ferò ce muunje à lo a du à rò à rsu'si nyor, ce yi ñgãa mfà' ce boo bbyènge a m ce karkar àwàa rò, e ye ñkàa nje mù mñjée, a tuu yì ñwè rfà' mò' e du a lor a vu àgho. <sup>6</sup> E mñ' ñkàa anà, a ye muu njo ce e ce war. E koosi mnse nè ye, a laa enê, “Cena yu mò' efa boo bèe Hibrù.”

<sup>7</sup> Njar muu anà à bipshì nè ye enê, “M du roo njeñwè ñwè Hibrù mò' te e bo ce nyonji muu anà nè wè a?” <sup>8</sup> Muu Ferò anà à beesì ye enê, “Dù.” Awe, muunje anà à du a ke' ma muu anà. <sup>9</sup> Muu ñkũu anà à laa nè ye enê, “Lòr muu ca du ce nyonji ye nè mè te m la' wè.” E ka' làa wa'a, e lor muu anà a ce yusi ye.

<sup>10</sup> Muu anà à ka' kù', e lor ye a du àgho a fa nè muu Ferò ce muunje cà, e koo muu anà à muu yì. E fa ye rlii ene Musis<sup>c</sup>, a laa enê, “Mè m fũr ye ba enjep rò.”

### Musis à cañ a du à ñgõñ Midiyàn

<sup>11</sup> À m ba nyù mò' ce Musis à kù' wée, a du à rye bũr vi ce a m ba bée Hibrù àmbò a ce fà' à bkwàa. E m ye àmbò ñwě Ijip mò' ce lip ñwè Hibrù mò' ce e m ba mò' efa bũr Musis. <sup>12</sup> E ka' kè'si ñgòn ye ñwè ka', a yu ñwě Ijip anà, a suti njeñ nshè. <sup>13</sup> Tù' à ka' raa, e fũu a ker dù, a ka' fyè' a ye àmbò mmbanrù mo' bèe Hibrù a ce rè bkòr. E laa nè ñwè ce e m gèe fàa nà enê, “À ce lip nfurò njokè?”

<sup>14</sup> E beesì enê, “Ɖwè ce e gèe ene à ba mbe wěr ndù, ce sa' wer mnsa' à gèe nda? Wě ròò à ryu mè àmbò wè mu yu ñwě Ijip nà a?” Musis à wep, a kwa'shi enê, “Nè mini—ñwè, bèe a rìñ yuu ce mè mu gee nà wée.” <sup>15</sup> Ferò à ka' yu' yuu ce yi mu koni, a roo à ryu Musis. Musis à cañ a du a ce cu à ñgõñ Mediyàn.

Musis à m lò a du a cu àgee rdip rtuñ. <sup>16</sup> Yi m ba wa' ce ñwè tanshi tanshì e à ñgõñ Mediyàn à m tur boo bbyènge bèe nsàambâ. Wowèe a m vù a tu' mndip a

---

<sup>b</sup>2:4 Rlii njar yì anà li m ba ene Miriyàm. Fyè' ñwà' Nombàs 26:59

<sup>c</sup>2:10 Rlii ene Musis li ce yu'ti à li Hibrù enê, ‘sùñ fũr’

ruusi mnyii àgho, a nosi mbu yàp ta àgho. <sup>17</sup> Ngãa ncìṅ njèe mo' a vu a juu wowèe. Musis à natì a du a ja' wowèe, a nosi nè yap mbu. <sup>18</sup> Boo bbyèṅge anà a ka' kùti dù ye yàp tâ ce Ruwèl, e bipshì nè wowèe enê, “Wèe à kùti à là' ntini cèrcer wa' njokè?” <sup>19</sup> Wowèe a beesì ye enê, “Dwè à to' Ijip mò' à ja' wèr embà mmbo ngãa ncìṅ njèe, a ker sũṅ mndip a nosi yer mbu.” <sup>20</sup> E laa nè boo vi enê, “Dwè anà yû? Wèe à mà'shi ye àfo njokè? Dù nè du kè' ye tɛ e vu ye yuu.”

<sup>21</sup> Musis à byemì, a vu a koṅ à rce cu a ṅwè anà. E lo a fa muu yì ce a m ce too ene Sìporà nè Musis à ṅwa. <sup>22</sup> Sìporà à lo a bi muu mbanrù, Musis à fa rlii muu ene Geshòm<sup>d</sup>, a laa enê, “M yu kilò àfa àfa. A mbùu ce a too muu anà ene Gèshòm.”

### **Nyù à yu' rwar bèe Isrèl**

<sup>23</sup> Nfè' à ka' dùni, ṅkuu e à to' Ijip à bu. Bèe Isrèl a ce warṅger àtu bkwàa ce a m ce fà', a war ene a ja' wowèe. Lap rwar ene a ja' wowèe li niṅ Nyù mbà tù'. <sup>24</sup> Nyù à yu' àmbò wowèe a ce warṅger, a kuushi lè' ce e m ye a Abràhâm ba Aisik ba Jakòp. <sup>25</sup> E fyè' bèe Isrèl, a koosi mnse nè wowèe.

---

<sup>d</sup>2:22 Rlii ene Geshòm li ce yu'ti à li Hibrù enê, ‘ṅwè nfuu’

# DWÀ' RFUU

## 3 Nyù à m kε' Musis

<sup>1</sup> À m ba nyù mò' Musis à ka' ce cìŋ mbu talu yì ce Jetrò ce e m ba ŋwè taŋshi taŋshi nè bèe Midiyàn. E m lòr mbu anà a du àgho à mbèp e mbà mbùunti à nteerèŋ. E m dù a ba' Horèp<sup>c</sup> ce yu rtùu Nyù. <sup>2</sup> Ncìndap Yawè à yæti nè ye enjep mù mu ce mo' nji à mncùŋ mor. E ka' fyε' a ye àmbò mor yi ce keti mbe ce, geewa'a, ce anà yi ke' ce she ka'. <sup>3</sup> E laa nè yì nyor enê, “Cena yu ba yuu bèe! M be ko'shi àtutu ye ka mbùu ce ce yi ce she ka'.”

<sup>4</sup> Yawè à ka' ye enε Musis à vù àtutu à rye', Nyù à ke' ye embe mù ce anà enê, “Musis! Musis!” E beesì enê, “A mè na.”

<sup>5</sup> Nyù à laa nè ye enê, “Fa ko'shi àtutu ka'. Co'ni wo blaba' njobè' mbe di' à tεε anà yu di' rara.” <sup>6</sup> E m ker laa nè ye enê, “A mè Nyù wo btâ. A mè Nyù Abrâham ba Aisik ba Jakòp.” Musis à ka' yu' wa'a, a cete vi bsii njobè' e m ce wεp à rfyε' Nyù.

<sup>7</sup> Awε, Yawè à laa enê, “Nè mini—ŋwè, mè ye mlù ce yà bèe ce a yu à to' Ijip a ce ye. Mè yu' àmbò wowèe a ce war njo' ŋge' ce bèe ce wowèe a ce fà' bkwàa nè wowèe a ce fa nè wowèe. Mè riŋ ŋge' ce wowèe a ce ye. <sup>8</sup> Mè sùu tε m bo fūr wowèe embà mmbo bèe Ijip, fūr wowèe e a ŋgõŋ Ijip, ko' àgho à ŋgõŋ ce yi bõŋ, a bêr, a ba ŋgõŋ ce mmbee nà' ba blù vi ce lεŋ àfo lεŋ. Dgõŋ anà yu ŋgõŋ ce bèe Kenàn ba bèe Hit ba bèe Amò ba bèe Peris ba bèe Hif ker ba bèe Jεbùs a ce cu àfo. <sup>9</sup> Yê, rwar bèe Isrèl li vù a niŋ mè mbà tù', a ker ye àmbò bée à to' Ijip a ce jar nè wowèe.

<sup>10</sup> Vù, m be tuu wè tε à du ye Ferò tε à bo fūr yà bèe ce boo Isrèl e à to' Ijip.”

<sup>11</sup> Geewa'a, Musis à bipshi nè Nyù enê, “A mè nda ka' dù ye Ferò fūr boo Isrèl e à to' Ijip?”

<sup>12</sup> Nyù à beesì nè ye enê, “M be ba wèe sò. Cena yi be ba ncòo nè wè enε a mè ce mè tuu wè. Wè ka' fūr bèe ca e à to' Ijip, wèe vu loo nè mè mbe rtùu ca.”

<sup>13</sup> Musis à bipshi nè Nyù enê, “M ka' du ye bèe Isrèl, laa nè wowèe enê, Nyù wee bta à tuu mè enε m vu ye wèe. Wowèe a ka' bipshi nè mè enê, ‘Li rlii a nda?’ M laa mε ke nè wowèe à?”

---

<sup>c</sup>3:1 Rlii enε Horèp ku ba rlii Rtùu Sinàye mo'

<sup>14</sup> Nyù à beesì nè ye enê, “A MÈ DWÈ CE M YU.” A ker laa nè ye enê, “Làa nè bée Isrèl enè M YU à tuu wè nè wowèe.” <sup>15</sup> Nyù à ker laa nè Musis enê, “À be làa nè bée Isrèl enè Yawè ce e yu Nyù wap btâ, ce a Nyù Abràham a ba Nyù Aisik a ba Nyù Jakòp, à tuu lè wè nè wowèe. Rlii ca a la rlii à nfè' wèwè ce ngù bée wèwè a be kè ce kuushi mè àgho. <sup>16</sup> Dù baashi bleebèe efa mù bée Isrèl, laa nè wowèe enê, Yawè ce e yu Nyù wap btâ, ce a Nyù Abràham ba Aisik ba Jakòp à yæti nè wè, a ce laa enè e fyè' wowèe, a ye yuu ce a ce gèe nè wowèe à to' Ijìp. <sup>17</sup> E kà'ni enè e be fur wowèe efa mlù ce wowèe a ce ye à to' Ijìp, dù àgho à ngòn bée Kenàn ba bée Hit ba bée Amòr ba bée Pèris ba bée Hif ker ba bée Jèbùs ce yu ngòn ce mmbee nà' ba blù vi ce lèy àfo lèy. <sup>18</sup> Wowèe a be yu' yuu ce wè làa. À be lòr bleebèe efa mù bée Isrèl tè wèe wowèe du ye nkũ e à to' Ijìp, làa nè ye enè Yawè ce e yu Nyù bée Hibrù à yæti nè wèe. Kee ye e ma'shì tè wèe jèr dù à nteerèy à mnõy btaar tè wèe bo dù tanshi tanshì nè Yawè ce e yu yè Nyù. <sup>19</sup> Geewa'a, mè rìy menè nkũ e à to' Ijìp be mà'shì tè wèe du ka', ce ka' tè ba enè a dòo ye dòo à nger ka'. <sup>20</sup> M be nàa ya bo, mà' nge' nè to' Ijìp nè buu bbèe ce m be gèe àfo. M ka' gee wa' wèe, e be mà'shì wèe tè wèe dù. <sup>21</sup> M be gèe tè bée à to' Ijìp a tur yà bée ca à ntee bõyboy. Be ba mbe nfè' ce wèe à nàti a ce dù nà, tè wèe du mbòmbo ka'. <sup>22</sup> Njèwè wèwèe be dù ye bbyènge e à to' Ijìp ce a ce cu àgee wowèe kè bbyènge ce a ce cu a wowèe mbe wăp ndàp, làa enè a fa wowèe buu rìgò ce a kupshi nè gul ba silvâ, ker fa wowèe bcè'. Wèe be yarsi boo wèe ce boo mmbanrù ba boo bbyènge àgho. A mbò wèe be gèe wa'a à rghùp Ijìp dù àgho.”

# DWÀ' RFUU

## 4 Nyù à m fa Musis nger à rgèe buu bghagha'

<sup>1</sup> Musis à beesì nè Yawè enê, “Wowèe a be byemi nè mè ka' kè yu' yuu ce m ce làa ka'. Wowèe a be kani enê Yawè à m yeeti nè mè.”

<sup>2</sup> Yawè à bipshì nè ye enê, “À tur ba ke nje bò nà?”

E beesì enê, “A mbàṅ.”

<sup>3</sup> Yawè laa nè ye enê, “Mà' njep nshè.”

Musis à ma', e beenger à nyo, Musis à caṅ efa gee mo. <sup>4</sup> Geewa'a, Yawè à laa nè ye enê, “Fa bo koo àgho à ṅkùṅ.” Musis à fa bo a koo, e kuti à mbàṅ nje yě bò.

<sup>5</sup> Awe, Yawè à laa enê, “À be lò dù dùṅshi mncòo ca te wowèe a bo byemi enê Yawè ce e yu Nyù wap bta ce e yu Nyù Abràham a ba Nyù Aisik a ker ba Nyù Jakòp à m yeeti nè wè.” <sup>6</sup> Yawè à ker laa nè Musis enê, “Fa yo bo njep yo cè' mbe cùu ntee.” Musis à fa njo, a ka' fur yi bo a ye yi ba mnsàasi mnsàasi a ce fup àmbò mṅghòo wa'a. <sup>7</sup> E ker laa nè ye enê, “Kusi yo bo njep cè'.” E kusi, a ka' fur enjo, yi kuti bònbon àmbò bdi' mo' efa yě nyòr yu nà.

<sup>8</sup> Awe, Yawè à laa nè Musis enê, “Wowèe a ka' te byemi nè wè ka', fa bfee à ncòo ce wè dùṅshi entombi nà ka', banε wowèe a be byemi njobè' ncòo ce m be dùṅshi embe nji mo. <sup>9</sup> Geewa'a, wowèe a ka' te byemi mncòo bbaa ca kè yu'shi yuu ce à be làa ka', banε à be sep mndip enjep Nâi, cu'ni à nshè, mndip ce wè sep anà mi beenger njep nshè à blεε.”

<sup>10</sup> Awe, Musis à laa nè Yawè enê, “Oo Tatâ, mè m be riṅ à rlàa yuu bònbon ka' ke' e sese' ka' à nfè' ce wè ba ke' a ce làa nè yò ṅwè rfâ' nà. Mε ke de' jèete, la rlee li ce rèr.”

<sup>11</sup> Yawè à bipshì nè ye enê, “Dwè ce e m kupshi cùu ṅwè a nda? Dwè ce e ke gèe ṅwè ce de' ka' kè fuṅre è a nda? Dwè ce e ke gèe ṅwè ce ye buu kè fep è a nda? Mbò à gèe mē Yawè a? <sup>12</sup> Banε à du sè'ni. M be jà' wè te à ce de', ye'ni wè yuu ce à be làa.”

<sup>13</sup> Musis laa enê, “Oo yà Tatâ, kee wè, tuu ṅwě jεε.”

<sup>14</sup> Yawè à ka' yu' yuu ce Musis à làa, ntee yi ko' ye nè Musis, e bipshì enê, “Mbò nfuřò Èròn ce e yu ṅwè embe ndù' Levì yu àgho? Mè riṅ enê àde' e de' bònbon sê. Yê, e ce vù à rkoni wè. E be ye wè te e lu'shi enjep yě ntee. <sup>15</sup> À be de' nè ye fa ye blàa kù cùu te e bo làa. M be jà' wè wεwε te wè ce de', kèr ye'ni wè yuu ce wè be gèe. <sup>16</sup> Èròn a ṅwè ce e be ce de' nè bèe a wě tù. E be ba yo cùu, te à ba nè ye

àmbò mǎ Nyù wa'a. <sup>17</sup> Lòr mbàṅ ca à bò ce dù, du ce gee buu bbèè àgho.”

### **Musis à kuti à to' Ijìp**

<sup>18</sup> Musis à nati a kuti, a du a ye Jetrò ce a talu yì, a laa nè ye enê, “Kee wè, tɛ m kuti dù ye bfar wa à to' Ijìp tɛ m bo ye mɛnɛ wowèe a ku bii btèe le.” Jetrò à laa nè Musis enê, “Dù bònbon.”

<sup>19</sup> Yawè à laa nè Musis à ṅgõṅ Mediyàn enê, “Kuti à to' Ijìp njòbè' bée ce a m ce ròo à ryu wè nà a kwɛṅger wɛɛwɛ.”

<sup>20</sup> Awɛ Musis à lor ṅgwa yì ba boo vi ce boo mmbaṅrù a ko'si mbe jàaki' a kuti à ṅgõṅ Ijìp. Musis à m lòr mbàṅ Nyù nje bò fon.

<sup>21</sup> Yawè à laa nè Musis enê, “Wɛ kuti à to' Ijìp, à ye enɛ wè gèe buu bbèè ce mè fa wè nger enɛ à gee na kù ntombi nè Fèrò wɛɛwɛ. Geewa'a, m be tèesi yi ntee fà di' e bo mà'shi bée anà enɛ a du ka'. <sup>22</sup> À be làa nè Fèrò enɛ Yawè làa enê ‘Isrèl a muu yì nlee ce muu mbaṅrù, <sup>23</sup> e ker ce làa nè wè enɛ à ma'shi le tɛ muu yì ce muu mbaṅrù ca du gèe rloo nè ye. À ka' kani à rmà'shi ye, à riṅ enɛ e be yu muu wǒ nlee ce muu mbaṅrù.”

<sup>24</sup> Musis à fuu a ce dù, a ka' dù bà' mbe di' rlùshì mo', Yawè à vu a ce tà' à ryu ye.

<sup>25</sup> Awɛ, Sípòrà à lor lùr ce e cɛp a saṅ mbè' muu yì ce muu mbaṅrù àgho, a joo mṅkùu Musis nè ṅgùp mbè' anà, a laa enê, “Nè mini—ṅwè, a wè nduu wà ce mè koni njì à blɛɛ.” <sup>26</sup> Awɛ, Yawè à ma'shì ye mbe nfè' ce ṅgwa yì à m làa enê, “A wè nduu wà ce mè koni njì à blɛɛ.” njo' bù ce e gèe nè muu yì nà.

<sup>27</sup> Yi m ba wa'a, Yawè à ba nè laa nè Èròn enê, “Dù à nteerèṅ tɛ à bo koni Musis.” Awɛ, Èròn à du a koni ye mbe rtùu Nyù, a baa ye nje nyòr. <sup>28</sup> Musis à suṅ Èròn buu wɛɛwɛ ce Yawè à m tuu ye enɛ e du lâa, ker ba mncòo ce e m làa enɛ e duṅshi nà wɛɛwɛ. <sup>29</sup> Awɛ, Musis ba Èròn a du a vu nè bleebèe efa mù bée Isrèl wɛɛwɛ àbee.

<sup>30</sup> Èròn à suṅ wowèe buu ce Yawè à m làa nè Musis wɛɛwɛ, a duṅshi mncòo à bsii bée anà, <sup>31</sup> wowèe a byemì yuu ce a suṅ wowèe. Wowèe a ka' yu' enɛ Yawè à vu à ryɛ bée Isrèl, a ye ṅgɛ' ce wowèe a ce ye, wowèe a buu btu njep nshè a loo nè Nyù.

# ƆWÀ' RFUU

## 5 Musis ba Ɔròn a dù a ye Ferò à nfè' entombi

<sup>1</sup> Nfè' à ka' dùni, Musis ba Ɔròn a du a ye Ferò a laa nè ye enê, “A le yuu ce Yawè ce e yu Nyù bée Isrèl à làa na. ‘Ma'shi te yà bée a du te a bo dù gèe ñkà' nè mè à nteerèṅ.’”

<sup>2</sup> Ferò à bipshì nè wowèe enê, “Yawè anà a nda te m ka' yu'ni nè ye, mà'shi te bée Isrèl a dù? Mè rìṅ Yawè anà ka'. Àde' m ke ma'shi te bée Isrèl a du ka'.”

<sup>3</sup> Wowèe a beesì nè ye enê, “Nyù bée Hibrùs à le tarte wèr wowèe. Wèr ce loo le wowèe ene a ma'shi te wèr lor mnõṅ btaar dù à nteerèṅ, dù gèe taṅshì nè Yawè ce e yu le yèr Nyù, fà dì' e bo le yushi wèr nè byañ kèntàṅ kè nè kàafà' ka'.”

<sup>4</sup> Ferò à bipshì nè Musis ba Ɔròn enê, “Wèe à jepsi bée ca efa rfà' njokè? Kuti nè à cùu rfà'.” <sup>5</sup> Ferò à ker bipshì enê, “Yê, yè bée a kù' à ñgòn ca gòr, wèe à ce ròo ene wowèe a borni rfà' a?”

### Ɔgè' bée Isrèl ku ce bæmi bæmi

<sup>6</sup> À ka' ba nyù anà, Ferò à caasi rsa' nè ñgãa ñgàpshi mnfà' nè bée ker ba nè wap btu mfà' enê, <sup>7</sup> “Wèe be kèr ce fa bée anà bbuu te a bo ce boo nshe àgho àmbò wèe à mṁ ce fa nà ka'. Mà'shi nè te wowèe a du ròo bbuu nè yap bo. <sup>8</sup> Geewa'a, wèe be tàa wowèe te a ku ce boo nshe àmbò wowèe a mṁ ce boo nà. Wèe fa co' yuu embo ka', njobè' wowèe a ce fà' yuu ka'. A mbùu ce wowèe a ce war ene m ma'shi wowèe te a du gèe taṅshì nè yàp Nyù. <sup>9</sup> Gèe nè te wowèe a ce fà' tatap fà dì' wowèe a bo lòr yàp nfè' ce yu'shi ba blàa mnde' ka'.”

<sup>10</sup> Ɔgãa ñgàpshi mnfà' cà ba btu mnfà' cà a du a laa nè bée Isrèl enê, “Ferò à làa ene e be kèr fa wèe bbuu ka'. <sup>11</sup> Dù nè du ce roo bbuu nè me mmo, kè wèe be dù ròo efè è. Geewa'a, a be gápni me mnfà' ka' koo m̀càr.” <sup>12</sup> Bée Isrèl a m jèr à bdi' wèwèe à to' Ijìp a ce ròo ba bvup mnsañ àtu bbuu. <sup>13</sup> Ɔgãa ñgàpshi mnfà' a m ce dòoshi wowèe a ce làa enê, “Kù boo nè nombà nshe àmbò wèe a m ce boo à mnõṅ wèwèe mbe nfè' ce a m ce fa wèe bbuu nà.” <sup>14</sup> Ɔgãa ñgàpshi mnfà' vi Ferò a m vù a ce lipshì btu mnfà' ce wowèe a m lè mbendùu bée Isrèl, a ce bipshì nè wowèe enè “Wèe à boo nshe ntini ba nèn̄kùr àmbò wèe à mṁ ce boo à mnõṅ mo' ka' njokè?”

<sup>15</sup> Awe, btu mnfà' nè bée Isrèl a vù a ye Ferò a war nè ye enê, “Nyàr, wowèe a ce fa ñgè' nè yap ñgãa mnfà' wa' njokè? <sup>16</sup> A ker ce fa yap ñgãa mnfà' bbuu ka', geewa'a, a ku ce tàa wèr enê, ‘Boo nè nshe!’ Yê, a ce lipshì yap ñgãa mnfà' sè'ni

na. Yuu bebep à gèe lɛ ba bèe ηkɯɯ.”

<sup>17</sup> Awe, ηkɯɯ à laa nè wowèe enê, “Wèe yu bbor. Wèe à bor sê, a mbùu ce wè ce làa enɛ m ma'shi tɛ wèe du gèe taŋshì nè Yawè. <sup>18</sup> Kutì nè à ncùu rfà' sè'ni! A be kèr ce fa wèe bbuu ka', geewa'a, wèe be kù ce boo nombà nshe àmbò wèe à mɯ ce boo nà.”

<sup>19</sup> Btu mnfà' nè bèe Isrèl a ye enɛ yi bàŋ nè wowèe bàŋ mbe nfè' ce a m làa nè wowèe enê, “Wèe fa gápni nombà nshe ce a mɯ ce boo à mnòŋ wɛɛwɛ nà ka'.”

<sup>20</sup> Wowèe a ka' ce fɯɯ embe nto' Fèrò, a ye Musis ba Èròn àmbò a ba tɛɛ a ce kè' wowèe, <sup>21</sup> a laa nè Musis wèe enê, “Tɛ Yawè ye yuu ce wèe à gèe, sa' wèe, njobè' wèe à gèe wèr à bep à bsii Fèrò ba vi bleebèe, a fa wowèe kàafà' nje bò enɛ a yushi wèr àgho.”

### **Musis à war nè Yawè**

<sup>22</sup> Awe, Musis à kutì a war nè Yawè enê, “Oo Yawè, wè mà' ηge' nè bèe ca wa' njokɛ? Wè m ke tuu mè njokɛ? <sup>23</sup> Kɛ' àmbò mè mɯ vɯ a ye Fèrò tɛ m bo làa yuu nè ye a wě tù, e ku ce jar nè bèe ca jar, wè ke' gee yuu mo' à rfur yò bèe efa ηge' ka'.”

# DWÀ' RFUU

## 6 Nyù à m kà'ni enɛ e be fɔr bèe Isrèl

<sup>1</sup> Awɛ, Yawè à laa nè Musis enê, “À be ye yuu ce m be gèe nè Fèrò sè'ni. E be nàa bèe Isrèl à ya nger, jùu wowèe embe yě ngònɔ à nger.”

<sup>2</sup> Nyù à de' nè Musis, a laa nè ye enê, “A mè Yawè. <sup>3</sup> Mè m yeeti nè Abráhâm ba Aisik ba Jakòp àmbò Nyù Ce E Tur Dger wɛwɛ. Geewa'a, mè m gèe wowèe a riŋ mè à la rlii ce enɛ Yawè ka'. <sup>4</sup> Mè m ye lè' wèr wowèe foŋ enɛ m be fa ngõŋ Kenàn nè wowèe ce yu ngònɔ ce wowèe a m cu àfo à bkilò. <sup>5</sup> Yi embe nji mo yi yu enɛ mè yu' rwar bèe Isrèl ce bée à to' Ijip a gèe wowèe à bkwàa nà, a kuushi ya lè'<sup>f</sup>. <sup>6</sup> Bane à laa nè bèe Isrèl enê, ‘A mè Yawè. M be fɔr wèe efa nge' ce wèe ce ye njeɓ tii bèe Ijip, fɔr wèe efa bkwàa ce wèe ce fà' nè wowèe. M be nàa ya bo, mà' ku' nge' nè wowèe, tee wèe efa bkwàa. <sup>7</sup> M be koo wèe à yà bèe, ba yè Nyù, tɛ wèe bo riŋ enɛ a mè Yawè ce e yu yè Nyù ce e fɔr wèe efa nge' enjeɓ tii bèe Ijip. <sup>8</sup> M be vù nè wèe mbe ngònɔ ce mè m kàa enɛ m be fa nè Abráhâm ba Aisik ker ba Jakòp nà. M be fa nè wèe tɛ ba ye. A mè Yawè!’”

<sup>9</sup> Musis à suŋ bèe Isrèl buu ca, geewa'a, wowèe a yu'shì yuu ce e làa ka' njobè' ntee ce yi m kwe wowèe, ker ba njobè' mnfà' bkwàa mntatap ce a m ba njo.

<sup>10</sup> Awɛ, Nyù à laa nè Musis enê, <sup>11</sup> “Dù, du laa nè Fèrò ce ŋkuu bèe Ijip enɛ e ma'shi tɛ bèe Isrèl a fɔr efa yě ngònɔ.”

<sup>12</sup> Geewa'a, Musis à bipshì nè Yawè enê, “Yê, bèe Isrèl a ka' te yu' mè ka', Fèrò gee e kɛ ka' yu' mè ce la rlee li ce rèr na?”

<sup>13</sup> Awɛ, Yawè à laa nè Musis a Èròn, a fa wowèe nlàa kuu bèe Isrèl ker kuu Fèrò ce ŋkuu bèe Ijip. E laa nè wowèe enɛ a du fɔr bèe Isrèl e à ngõŋ Ijip.

### Mmbùundap Musis ba Èròn

<sup>14</sup> Cena a btu e à mndap bèe Isrèl mo':

Boo mmbaŋrù vi Rùben ce e m ba nlee muu Isrèl à m ba Hanòk ba Palù ba Hezròn ker ba Kamì. Bèe ca à m ba mntè' Rubèn.

<sup>15</sup> Boo Simiyòn ce boo mmbaŋrù à m ba Jemùwèl ba Jamìn ba Òhad ba Jakìn ba Zohà ker ba Shàwul ce a muu mbaŋrù yi njeŋwè ŋwè Kenàn mò'. Cena à m ba mntè' Simiyòn.

<sup>16</sup> Cena a mlìi boo vi Levì ce boo mmbaŋrù àmbò yàp ŋgù à m ba; à m ba Geshòn

---

<sup>f</sup>6:5 fyɛ' 2:24

ba Kohàt ba Mèrari. Levì à m cu à ngòn bfè' rjèe nè ncòp—sàamba—à—mntaar (137).

<sup>17</sup> Boo vi Geshòn ce boo mmbaṅrù à m ba Lepni ba Shimèye àmbò wap mntè' vi m ba.

<sup>18</sup> Boo mmbaṅrù vi Kohàt à m ba Àmràm ba Ìsar ba Hebròn ba Usiyèl. Kohàt à m cu à ngòn bfè' rjèe nè ncòp—taar—à—mntaar (133).

<sup>19</sup> Boo mmbaṅrù vi Mèrari à m ba Màli ba Mushi. Cena a mndù' bée Levì àmbò yap ràrà yi m ba.

<sup>20</sup> Amrà m ló a lor Jokebèt ce njar yi ta à ngwa. Jokebèt à m ló a koo rbù a bi Èròn ba Musis. Amrà m cu à ngòn bfè' rjèe nè bfè' ncòp—sàamba—à—mntaar (137).

<sup>21</sup> Boo mmbaṅrù vi Isà à m ba Korà ba Nefèg ker ba Sikri.

<sup>22</sup> Boo mmbaṅrù vi Yùsiyèl à m ba Elsafàn ba Sitri.

<sup>23</sup> Èròn à m ló a lor Èlishèbà ce e m ba muu Àminadàp, à ba njar Nàshòn à ngwa. E m ló a koo rbù a bi Nadàp ba Àbihù ba Èlèyesà ba Itamà.

<sup>24</sup> Boo mmbaṅrù vi Korà à m ba Àsir ba Èlkanà ker ba Àbèyasàf. Cena a mndù' bée Korà.

<sup>25</sup> Èlèyesà ce muu Èròn à m lór ngwa ce a mò' efa boo bbyènge vi Pùtiyèl, e bi Finhàs a ye. Cena a btu embe ndàp Levì à mntè' à mntè'.

<sup>26</sup> Èròn ba Musis ca a bée ce Yawè à m làa nè wowèe enê, “Fur nè bée Isrèl e à to' Ijip à bkur a bkur à wap mntè'” nà. <sup>27</sup> A wowèe ca, Musis ba Èròn ce a m de' nè Ferò ce ṅkuu e à to' Ijip kuu enè wowèe a lor bée Isrèl fuu àgho e à to' Ijip.

### **Àmbò Nyù à m tuu Musis a Èròn**

<sup>28</sup> À m ba nyù ce Yawè à m làa nè Musis à to' Ijip nà, <sup>29</sup> e m làa nè ye enê, “A mè Yawè! Suṅ Ferò ce ṅkuu bée Ijip yuu wèewe ce m ce suṅ wè.” <sup>30</sup> Musis à bipshì nè Yawè enê, “Yê, la rlee li ce rèr. Àde' Ferò gee e kè ka' yu' mè?”

# ƆWÀ' RFUU

## 7 Musis a Ɛròn a tɛ kùntombi ne Fèrò

<sup>1</sup> Awɛ, Yawè à laa nè Musis enê, “Yê, mè gèe wè wè ba àmbò Nyù nè Fèrò wa'a, te nƒurò Ɛròn ba yò ɲwè ncep ntuu. <sup>2</sup> À be làa yuu wɛɛwɛ ce mè làa enɛ à làa, te nƒurò Ɛròn suɲ Fèrò enɛ e ma'shi te bèe Isrèl a ƒuu embe yě to'. <sup>3</sup> Geewa'a, m be tèesi ntee ese Fèrò, ka' m be kèse wa mncõo bghagha' ba buu bbèe à ɲgõɲ Ijip wa'a, <sup>4</sup> e be yu'shi yuu ce à ce làa ka'. E be gèe wa'a te m naa ya bo mbendùu Ijip, fa wowèe ɲge' sê, ƒur yà bèe ce bèe Isrèl efa wăp mu à mntè' à mntè'. <sup>5</sup> Bèe Ijip a be riɲ enɛ a mè Yawè mbe nfè' ce mè nàa ya bo mbendùu Ijip, a ƒur bèe Isrèl e àfo.” <sup>6</sup> Musis a Ɛròn a ku gee ba àmbò Yawè à m làa enɛ wowèe a gee nà.

<sup>7</sup> Mbe nfè' ce wowèe a m làa nè Fèrò nà, Musis à ba bfè' mwaami(80), Ɛròn à ba bfè'-ncòp-taar-à-mwaami(83).

### Mbàɲ Ɛròn à bèeɲger à nyo

<sup>8</sup> Yawè à laa nè Musis a Ɛròn enê, <sup>9</sup> “Fèrò ka' laa nè wèe enê, ‘Dùɲshi nè ncòo,’ à laa nè Ɛròn enê, ‘Lòr yò mbàɲ ma' ɲjep nshè kùntombi nè Fèrò, te mbàɲ beeɲger à nyo.”” <sup>10</sup> Awɛ, Musis a Ɛròn a du a ye Fèrò a ku gee ba àmbò Yawè à m làa enɛ wowèe a gee nà. Ɛròn à ma' yi mbàɲ ɲjep nshè kùntombi nè Fèrò a vi bleebèe wèe, mbàɲ à beeɲgèr à nyo. <sup>11</sup> Fèrò à toi ɲgãa bfee ba ɲgãa bseɲ ba ɲgãa fii e à to' Ijip, wowèe a ku gee ba ɲjèe buu anà foɲ à map mfà' ɲji. <sup>12</sup> Ɖwè wɛɛwɛ efa wowèe à m mà' yi mbàɲ ɲjep nshè, e beeɲgèr à nyo foɲ. Geewa'a, mbàɲ yi Ɛròn à m mi mmbàɲ wap. <sup>13</sup> Ka' yi m koni wa'a, ntee Fèrò yi tée, e ke' yu'ni nè wowèe ka', àmbò Yawè à m làa nà (seesê).

### Mndip mi m bèeɲger à blɛɛ

<sup>14</sup> Awɛ, Yawè à laa nè Musis enê, “Ntee Fèrò yi tée, e kanì à rmà'shi te wèe dù. <sup>15</sup> ƒuu du ye Fèrò à mu ɲgàptu' à nfè' e ce dù mbà rò. Tɛɛ àwãa Rɲip Nâi te à bo ye ye, lòr yò mbàɲ ce e mu beeɲger à nyo nà, <sup>16</sup> laa nè ye enɛ mɛ Yawè ce m yu Nyù bèe Hibrùs à tuu wè enɛ à laa nè ye enê, ‘Mà'shi yà bèe te a dù, te a bo dù loo nè mè à ɲgõɲ nsaruɲ! Geewa'a, vu ba' sè'ni na wowèe a be yu' ka'. <sup>17</sup> A yuu ce Yawè à le làa na, “M be gèe ca te à bo riɲ enɛ a mè Yawè.” Yê, m be lòr mbàɲ ce mè tur ɲje bo na lìp mndip enjep Nâi àgho te mi beeɲger à blɛɛ. <sup>18</sup> Nca enjep Nâi yi be kweɲger, te rɲip li ce rùu te bèe Ijip a moo à rno mndip enjo làr.””

<sup>19</sup> Yawè à ker laa nè Musis enê, “Làa nè Ɛròn enê, ‘Lòr yò mbàɲ, ma' lo rkoo

mbendùu mndip e Ijìp ba mbendùu mndip ce mi ce cãa ba mndip ce a kènte mi ce cãa ba à mnènyeŋ ker ba mndip ce a ber à buu wεεwε tε mi beeŋger à blεε. Blεε vi be ba à bdi' wεεwε à ŋgõŋ Ijìp, ka' à mŋkãa ce a sò' nè mntaŋguu, ka' à mntuŋ blùr.

<sup>20</sup> Awε, Musis a Èròn a ku gee ba àmbò Yawè à làa anà. Èròn à naa yì mbàŋ kùntombì nè Fεrò ba yì bεε bgòrgòr, a lip mndip enjep Nai àgho, mndip mi beeŋgèr à blεε. <sup>21</sup> Nca enjep Nai yì kwengèr, mndip mi ruu ce àde' bèe Ijìp a no ka'. Blεε vi ba à bdi' wεεwε à ŋgõŋ Ijìp. <sup>22</sup> Geewa'a, ŋgãa fii e à ŋgõŋ Ijìp a m ku gee àmbò Èròn à m gèe nà à map mfà' nji, ntee Fεrò yì tēe, e ke' ce yu' yuu ese Musis a Èròn ka', àmbò Yawè à m làa nà. <sup>23</sup> E beeŋgèr a kuti kuti mbe yě nto', yuu anà yì ke' coo ye njep ntee ka'. <sup>24</sup> Bèe Ijìp wεεwε a tuŋ àwãa Nai tε a bo koni mndip no njobè' wowèe a m mòo à rno mndip enjep Nai làr. <sup>25</sup> Mnòŋ sàamba vi cãa, ke' embe nòŋ ce Yawè à m lip Rdip Nai nà.

# DWÀ' RFUU

## 8 Kèntàṅ ce yu bja'

<sup>1</sup> Awe, Yawè à laa nè Musis enê, “Dù du ye Ferò laa nè ye ene Yawè à làa enê, ‘Mà'shi yà bèe te a du te a bo dù loo nè mè. <sup>2</sup> Geewa'a, à ka' kani à rmà'shi ene wowèe a dû, bane m be vù nè kèntàṅ ce yu bja' mbendùu yo to' wεεwε. <sup>3</sup> Rdip Nai li be ruu nè bja' ce vi be fūuse niṅ a wée mndap ba à brum ndap, ko' à bkuu, ba à mndap ye ṅgãa mfà' ba yè bèe ba ye dĩ' ntòò brėd, ker ba à bkaṅ ce a ke top brėd njo. <sup>4</sup> Bja' anà vi be ko' àndùu wèe ba yè bèe ker ba ye ṅgãa mfà' wεεwε.”

<sup>5</sup> Yawè à laa nè Musis enê, “Làa nè Èròn ene e naa yi mbàṅ mbendùu mndip ce mi ce càa ba mbendùu mndip ce a kèṅte mi ce càa ker ba mndip ce a ber à buu, gee te bja' vi fūuse cete ṅgõṅ Ijip.”

<sup>6</sup> Awe, Èròn à naa yi bo mbendùu mndip Ijip, bja' vi fūusè a cete ṅgõṅ Ijip.

<sup>7</sup> Geewa'a, ṅgãa fii a gee fii, à map mnfà' nji, bja' vi fūusè à ṅgõṅ Ijip bìi foṅ.

<sup>8</sup> Awe, Ferò à to Musis a Èròn a laa nè wowèe enê, “Loo nè nè Yawè te e ca'si bja' ca ese mè ba ese yà bèe te m ma'shi yè bèe te a du gèe taṅshi nè Yawè.”

<sup>9</sup> Musis à beesì nè ye enê, “Nyàar! M be yu' rbòn à rloo le nè wowèe ba yap ṅgãa mnfà' ker ba yap bèe ene a fur bja' ese wowèe ba wap mndap, te ku cu ba vi njep Nâi.”

<sup>10</sup> Ferò à laa nè ye enê, “Fuu vù loo àyàṅsè.”

Awe, Musis à beesì ye enê, “Yi be ba le àmbò wowèe a làa te wowèe a bo riṅ le ene nyù mò' yu àmbò Yawè ce e yu yèr Nyù ka'. <sup>11</sup> Bja' vi be da'se le ese wowèe ba e à wap mndap ker ba à mndap yap ṅgãa mfà' ker ba yap bèe te ku beti le ba vi enjep Nâi.”

<sup>12</sup> Awe, Musis a Èròn a ma'shi Ferò a du. Musis à war nè Yawè kuu bja' anà àmbò a Ferò a ba byemi àgho nà. <sup>13</sup> Yawè à ku gee àmbò Musis à làa nà, bja' e à mndap ba vī à mlà' ker ba vī à mṅkù vi kwεṅgèr. <sup>14</sup> Bèe Ijip a baashì bgùu bja' anà à bkur à bkur, caar ṅgòn Ijip bìi yi kè' a ce rùu. <sup>15</sup> Geewa'a, Ferò à ka' ye ene fu' yi koo ye, e teesi yi ntee, a kani à ryu' yuu mo' ese Musis ba Èròn àmbò Yawè à m làa nà.

### Kèntàṅ ce yu mṅkwar

<sup>16</sup> Awe, Yawè à laa ne Musis enê, “Làa nè Èròn ene e naa yi mbàṅ lip nfùnfu enjep nshè àgho te e beenṅger à mṅkwar à ṅgõṅ Ijip wεεwε.” <sup>17</sup> E ka' làa wa'a, wowèe a ku gee àmbò e làa nà. Èròn à naa yi mbàṅ a lip nfùnfu enjep nshè àgho.

Nfùnfu anà à beenḡèr mḡkwar a cete bèe ba mnyàa e à ḡḡḡ Ijìp wεεwε.

<sup>18</sup> Geewa'a, ḡḡaa fii a ka' ḡhèter à rḡrḡmḡkwar à fii, a moo làr. Mndàndàḡ/mḡkwar vi cetè bèe ba mnyàa wεεwε.

<sup>19</sup> Yi ka' koni wa', ḡḡaa fii a vu a laa nè Ferò enê, “Ntubo Nyù yu njo!” Geewa'a, Ferò à teesi ntee, a yu' yuu ce wowèe a làa ka', àmbò Yawè à m làa nà.

### **Kèntàḡ ce yu mḡjiki**

<sup>20</sup> Awε, Yawè à laa nè Musis enê, “Nàti à mu ḡḡaptu' du ye Ferò mbe nfè' ce e ce dù mbà rò, laa nè ye enε Yawè à làa enê, ‘Mà'shi yà bèe te a dû, te a bo dù loo nè mè. <sup>21</sup> Yê, à ka' te mà'shi yà bèe enε a du ka', banε m be tuusi mḡjiki àndùu wè ba yo ḡḡaa mnfà' ba yò bèe ker ba à wee mndap. Mndap bèe Ijìp vi be ruu nè mḡjiki vi ker ruu mbe nshe ce wowèe a yu.

<sup>22</sup> ““Geewa'a, be ba à nòḡ anà te m lè ḡḡḡ Goshèn fàdì' ce yà bèe a ce cu te yi ba jεε, mḡjiki vi be ba àfo ka', te à bo rìḡ enε m̃ Yawè m yu mbe tunshè. <sup>23</sup> M be lè ndèe mbetar yà bèe ba yò bèe. Ncõo ḡhagha' ca be koni àyàḡsè.”

<sup>24</sup> Awε, Yawè à ku gèe àmbò E làa nà, a tuusi ku' mḡjiki mbe nto' Ferò ba à mndap yi ḡḡaa mnfà'. A m bepsi ḡḡḡ Ijìp wεεwε ne mḡjiki. <sup>25</sup> Awε, Ferò à toi Musis a Èròn a laa nè wowèe enê, “Dù nè du gee taḡshì nè yè Nyù à dì' mo' mbe nshe ca.”

<sup>26</sup> Geewa'a, Musis à beesi nè Ferò enê, “Nyàar! Yi be ba lε yeeni à rgèe wa' ka' njobè' taḡshì ce wèr ce gèe nè Yawè ce e yu yèr Nyù yu yuu jàasi nè bèe Ijìp. Wèr ka' gee taḡshì ce yi yu jàasi à bsii bèe Ijìp, banε wowèe a be tuushi lε wèr nè blùr. <sup>27</sup> Wèr tur à rjèr à mnõḡ btaar à nteerèḡ dù gèe taḡshì nè Yawè ce e yu yèr Nyù àmbò e làa nè wèr.”

<sup>28</sup> Ferò à laa nè wowèe enê, “M be mà'shi te wèe du dù gèe taḡshì nè Yawè ce e yu yè Nyù à nteerèḡ, geewa'a, wèe tur à rdù à njisàp ka'. Loo nè nè mè.”

<sup>29</sup> Awε, Musis à laa enê, “Nyàar! Yê, m ce fuu lε efa wap bsii, banε m be loo Yawè nè wowèe, e ba àyàḡsè te a ca'si mḡjiki embe nto' Ferò ba embe mndap yap ḡḡaa mnfà' ba mndap yap bèe. Ku ba lε ba enε Ferò fa bo' lε wèr enε a be mà'shi wèr te wèr du dù gèe taḡshì nè Yawè ka'.”

<sup>30</sup> Awε, Musis à fuu embe nto' Ferò a du a loo nè Yawè. <sup>31</sup> Yawè à ku gee àmbò Musis à ba loo nà, a ca'si mḡjiki embe nto' Ferò ba mndap yi ḡḡaa mnfà' ker ba yi bèe. Koo mbù njiki mò'sir à m beti ka'. <sup>32</sup> Geewa'a, Ferò à ker teesi ntee a kani bèe anà efa rdù.

# DWÀ' RFUU

## 9 Mnyàa vi m kweŋger

<sup>1</sup> Awe, Yawè à laa nè Musis enê, “Niŋ mbe nto' Ferò laa nè ye enê, ‘A yuu ce Yawè ce e yu Nyù bée Hibrùs à làa na, “Mà'shi yà bée te a dû, te a bo dù loo nè mè. <sup>2</sup> À ka' kani efa rmà'shi wowèe ene a dû, ku kur wowèe, <sup>3</sup> yê, bo Yawè yi be sùu nè byaŋ kèntàŋ btatap mbendùu wee mnyàa ce yu mnyàabàrà' ba bjàaki' ba bkàmél ba nà' ker ba mbu ce vi yu à mŋkù. <sup>4</sup> Geewa'a, Yawè be gèe jεε jεε efa mnyàa bée Isrèl ba vi bée Ijìp te mbù nyàa bée Isrèl mò'sir kwe ka'.”

<sup>5</sup> Yawè à lε nfè' a laa enê, “Be ba àyaŋsè te m gee wa'a.” <sup>6</sup> Tù' à ka' raa, Yawè à gee wa'a. Mnyàa bée Ijìp vi kweŋgèr wεwε, geewa'a, koo mbù nyàa bée Isrèl mò'sir à kwe ka'. <sup>7</sup> Ferò à tuu bée ene a du fyε', wowèe a du a yε koo nyàa bée Isrèl mò'sir à kwe ka'. Geewa'a, yi ntee yi ku tée, e ke' ma'shi bée anà ene a du ka'.

### Kèntàŋ ce yu buubtoo

<sup>8</sup> Yawè à laa nè Musis a Èròn enê, “Dò' nè mntabo bu enjep mor nlàa te Musis ŋwaŋ nje kì à bsii Ferò. <sup>9</sup> Bu anà yi be bèeŋger à nfùnfù, da' à ŋgòŋ Ijìp bìi, bèeŋger à buubtoo, bèeŋger à bkòte mbendùu bée ba mnyàa ce a yu à ŋgòŋ Ijìp bìi.” <sup>10</sup> Awe, wowèe a ŋo' bu enjep mor nlàa a tεε àgho kùntombi nè Ferò, Musis à ŋwaŋ nje kì, yi beeŋger à buubtoo mbendùu bée ba mnyàa, a beeŋger à bkòte. <sup>11</sup> Ngãa fii a moo à rteε kùntombi nè Musis làr njo' buubtoo. Vi m koo ŋgãa fii ba bée Ijìp wεwε. <sup>12</sup> Geewa'a, Yawè à teesi ntee ese Ferò, e ke' yu'ni nè wowèe ka', àmbò Yawè à m làa nè Musis nà.

### Kèntàŋ ce yu mghò

<sup>13</sup> Awe, Yawè à laa nè Musis enê, “Fuu nyεε à mŋ ŋgàptu' du tεε kùntombi nè Ferò, laa nè ye enê, ‘A yuu ce Yawè ce e yu Nyù bée Hibrùs à làa na: “Mà'shi yà bée te a du te a bo dù loo nè mè. <sup>14</sup> M be cù' wa bkèntàŋ mbe wě ndùu foŋ, cù' mbendùu yo ŋgãa mfà', ker ba mbendùu yò bée te à bo riŋ ene ŋwè mò' yu mbe tunshe na bìi àmbò mè ka'.” <sup>15</sup> À ba ba sè'ni mè banì a naa ya bo a cù' bkèntàŋ mbendùu wè ba yò bée, a siŋsi wè embe tunshe. <sup>16</sup> Geewa'a, a mbùu ce mè fεesi wè à rdùŋshi wè ya ŋger te a bo suŋ àmbò la rlii mbe tunshe bìi. <sup>17</sup> Wè ku bìi ko' yà bée nè mŋkùu mbe tù, a ke' ce mà'shi ene wowèe a du ka'. <sup>18</sup> Yê, be ba àyaŋsè à njèe nfè' e sè'ni na te m gee te ku' mghò mi gwê, te ba mì ce mi m be gwe à ŋgòŋ Ijìp ka', kε' embe nfè' ce a m fùu to' Ijìp caar vu ba sè'ni na. <sup>19</sup> Bane à laa te a vu nè yo

nyàa ba buu wεεwε ce wè tur à mḡkù mbe dì' ce yuu mo' yi be jòo ka' njobè' mghòo mi be gwè mbendùu bèe wεεwε ba mnyàa wεεwε ce vi yu à mḡkù, ce a kuti àgho à là' ka' te vi kweḡger.”””

<sup>20</sup> Bèe efa mḡ ḡḡaa mfà' Ferò ce a m yu'ni nè làa Yawè a m kàka a kuti nè ḡḡaa mfà' ba yap nyàa à là'. <sup>21</sup> Geewa'a, bèe ce a m yu'ni ka' a m mà'shi yap ḡḡaa mfà' ba yap nyàa à mḡkù.

<sup>22</sup> Awε, Yawè à laa nè Musis enê, “Nàa yo bo mbe bùu te mghòo mi bo gwè à ḡḡḡ Ijip bìi, gwè mbendùu bèe ba mnyàa ker ba bcòcò, ker ba mbendùu bcòcò wεεwε ce vi yu à mḡkù à ḡḡḡ Ijip.” <sup>23</sup> Awε, Musis à naa yi mbàḡ mbe bùu, Yawè à gee mbèḡ à rùḡḡèr, a ker gee mghòo mi gwè, mor yi suu mbe tunshe. Yawè à cu' mghòo à ḡḡḡ Ijip. <sup>24</sup> Mghòo mi m cù'ti, mor yi ce bàḡḡger àmù mo, à ba ku' mghòo ce mi m be gwe à ḡḡḡ Ijip ka', ke' embe nfè' ce a m fùu to' anà. <sup>25</sup> Mghòo anà mi m lìp yuu wεεwε ce yi m ce kù' à ḡḡḡ Ijip bìi, a yushi bèe ba mnyàa. Mghòo anà mi m lìp bcòcò ce vi m ce kù' à mḡkù wεεwε, a kepshi bce e à mḡkù wεεwε. <sup>26</sup> À m ku ba ba à ḡḡḡ Goshèn fàdì' ce bèe Isrèl a m ba ce mghòo mi m sè' ka'.

<sup>27</sup> Awε, Ferò à toi Musis a Èròn, a laa nè wowèe enê, “ Mè ye sè'ni enε mè gèe yuu bebep, Yawè à ce gèe yeḡni, wèr yà bèe wèe à gee ḡḡḡjì. <sup>28</sup> War nè nè Yawè njobè' Yawè à gèe mbèḡ à rùḡḡèr, mghòo mi gwe a ghεε sè'ni. M be mà'shi te wèe dù, wèe be kèr cu àfa ka'.”

<sup>29</sup> Musis à laa nè ye enê, “M ka' ku fūu efa mù rla' ca, m naa mmo nè Yawè te mbèḡ ker rùḡḡger ka', te mghòo mi borni te à bo rìḡ enε tunshe a yì Yawè. <sup>30</sup> À ka' ba àmbò wèe yo ḡḡaa mfà' wèe, mè rìḡ mēnε wèe ce wεp Yawè ce e yu Nyù ka'.”

<sup>31</sup> Mghòo mi m bepsi filàks<sup>g</sup> ba mnsaḡ njobè' mi m ku bur bùr, filàks à ku saati sàati. <sup>32</sup> Geewa'a, mghòo mi m bepsi sàa ba εmà<sup>h</sup> ka' njobè' mi m be tee ka'.

<sup>33</sup> Awε, Musis à lo efa gee Ferò, a fūu efa mù rla', a naa mi mmo nè Yawè, mbèḡ à ker ce rùḡḡger ka', mghòo mi borni, mbèḡ à teti embe tunshè. <sup>34</sup> Geewa'a, Ferò à ka' ye enε mbèḡ à teti, mghòo mi ker ce gwè ka', mbèḡ à ker ce rùḡḡger ka', a ker gee yuu bebep, a yi ḡḡaa mfà' wèe a ker teesi ntee. <sup>35</sup> Awε, ntee Ferò yi ker tēe, e ke' mà'shi bèe Isrèl enε a du ka', àmbò Yawè à m làa ḡḡi enjep Musis nà.

---

<sup>g</sup>9:31 Filaks a ḡḡèe còcò mo' ce bèe Ijip a m fà' ce koni mbà' enjo ce kupshi bcè' àgho.

<sup>h</sup>9:32 εmà à m ba ḡḡèe mnsaḡ mo'

# ƆWÀ' RFUU

## 10 Kèntàŋ ce yu mŋguu

<sup>1</sup> Yawè à laa nè Musis enê, “Dù du ye Ferò, njobè' mè tèesi yi ntee ker ba mntee yi ngãa mfà'. Dù te m bo dùŋshi wa mncöö bghagha' ca a wăp mu. <sup>2</sup> Mè gèe wa'a, te à bo kè suŋ boo wo ba wo mmbishì njèe nji ce mè m jar nè bèe Ijìp bebep, kèr suŋ àmbò mè m dùŋshi wa mncòo àmù bèe Ijìp te wèe bo riŋ ene a mè Yawè.”

<sup>3</sup> Awe, Musis a Èròn a du a ye Ferò a laa nè ye enê, “A yuu ce Yawè ce e yu Nyù bèe Hibrùs à làa na, ‘À be kani à rsùusi yò nyor njep nshè kùntombi nè mè dù bà' fè? Mà'shi yà bèe te a dû, te a bo dù loo nè mè. <sup>4</sup> À ka' kani à rmà'shi wowèe te a dû, yê, banε m be vù nè mŋguu mbe wě to' àyàŋsè. <sup>5</sup> Vi be cete ngòŋ ca ce àde' yi yeeti ka'. Vi be ye mu ber yuu ce yi mu beti nè wè à nfè' mghòo mi mu mi wεε, kèr ye wo bce ce vi ce kù' à mŋkù wεεwε. <sup>6</sup> Vi be ruu à wo mndap wεεwε, ba à mndap yo ngãa mfà' wεεwε, ker ba à mndap bèe Ijìp wεεwε. Ca be ba yuu ce ka' wee btâ, ka' wee btarku a m be ye ka', ke' embe nòŋ ce a m bi wowèe vu ba' ntini.” Awe, Musis à ma'shì Ferò a dû.

<sup>7</sup> Ngãa mfà' Ferò a laa nè ye enê, “Ɔwè ca be ba à ndeŋ nè sèe dù bà' fè? Mà'shi bèe anà te a du te a bo dù loo nè Yawè ce e yu yàp Nyù. Wà' wè be riŋ ene Ijìp à bep wεε ka' a?”

<sup>8</sup> Awe, a kuti nè Musis a Èròn a vu a fa nè Ferò. E laa nè wowèe enê, “Dù nè du loo nè Yawè ce e yu yè Nyù. Geewa'a, a wèe kε ce a be dù?”

<sup>9</sup> Musis à laa enê, “Wèr be dù wèr wer bghàrbèe ba bleebèe, ker ba wèr wer boo mmbaŋrù ba boo bbyèŋge. Wèr be dù nè yer mbu ba yer nà' njobè' wèr à tur à rgèe ŋkà' nè Yawè.”

<sup>10</sup> Geewa'a, Ferò à laa nè wowèe enê, “Yawè ba wèe wowèe ce m ka' ke ma'shi wèe yè bèe wèe dû. Yê, wèe a kumi à rgèe yuu bebep. <sup>11</sup> Kaka'! Mà'shi te ku dù ba mmbaŋrù efa wée mu dù loo nè Yawè njobè' a yuu ce à ce ròo.” Awe, bèe a juu Musis a Èròn e à bsii Ferò.

<sup>12</sup> Awe, Yawè à laa nè Musis enê, “Nàa yo bo mbendùu ngõŋ Ijìp te mŋguu vi bo gwè mbe ngõŋ Ijìp ye bcòcò e à ngòŋ ca wεεwε, ce a buu wεεwε ce mghòo mi mu bepsi ka' nà.” <sup>13</sup> Awe, Musis à naa yi mbàŋ mbendùu ngõŋ Ijìp, Yawè à gèe, fu' e kù mbùunti yi caa à ngòŋ anà à nòŋ anà bìi ba nètu' anà bìi. À ka' ba àŋgàptu', fu' anà yi vu nè mŋguu. <sup>14</sup> Mŋguu anà vi niŋ à ngõŋ Ijìp bìi, a la'te à bdi' wεεwε embe ngòŋ anà ku' gòr sê, à ba ma kɛr mŋguu ce yi m be ba ka', kè kèr ba ka'. <sup>15</sup> Vi m

cete nshe wεεwε caar njep nshè yi ce sii sii. Vi m ye bcòcò wεεwε e à ngòn anà ba mbànce wεεwε ce mghòo mi mi bepsi ka'. Yuu còñ yi m beti à ngõñ Ijìp ka', ka' ce, ka' còcò e à mñkù. <sup>16</sup> Awε, Ferò à kakà a toi Musis a Èròn a laa enê, “Mè gèe yuu bebeb nè Yawè ce e yu yè Nyù, a gee nè wèe foñ. <sup>17</sup> Kee wèe, banε wèe ku foosi yà buu bbebeb ba nfè' mò'sir, loo nè nè Yawè ce e yu yè Nyù tε e ca'si kèntàñ nyushi bèe ca embe mǎ ndùu.” <sup>18</sup> Awε, Musis à ma'shì Ferò a du a loo nè Yawè. <sup>19</sup> Yawè à beesì fu' ca a fu' tatap embà mbùunti yi lor mñguu ca a doori a du àgho njep Rdip Rbeer. Koo mbu ñguu mò'sir à m beti à ngõñ Ijìp ka'. <sup>20</sup> Geewa'a, Yawè à teesì ntee ese Ferò, e ke' ma'shi ene bèe Isrèl a du ka'.

### **Kèntàñ ce yu tù'nji**

<sup>21</sup> Awε, Yawè à laa nè Musis enê, “Nàa yo bo mbe bùu tε tù' sii à ngõñ Ijìp, tε ba tù'nji ce bèe a be yu' nje nyòr.”

<sup>22</sup> E ka' làa wa'a, Musis à naa yi bo mbe bùu, tù'nji yí mini à cetè ngõñ Ijìp bìi à mnõñ btaar. <sup>23</sup> Yi m ba ce àde' ñwè yε ñwè ka', kè lε'si nyor embe di' ce e m ba ka', à mnõñ btaar. Ka' yi m ba wa'a, rraa li ku ba yi nè bèe Isrèl wεεwε à bdi' ce wowèe a m ce cu. <sup>24</sup> Awε, Ferò à toi Musis a laa enê, “Dù nè du loo nè Yawè. Àde' wèe ku du wèe yè bèe wèe wεεwε foñ. Kù ma'shi nè ba ye mbu ba ye nà' àfa.” <sup>25</sup> Geewa'a, Musis à laa enê, “À be kù mà'shi wèr tε wèr lor btañshì ba mfa mntòo tε wèr bo dù fa kùntombi nè Yawè ce e yu yer Nyù, à tañshì. <sup>26</sup> Yer nyàa yi be kù dù wèr wowèe, koo mbù mò'sir be cu mbenjì ka'. Wèr tur à rlòr mmo' efa gho gèe rloo àgho nè Yawè ce e yu yèr Nyù. Wèr be dù bà' àfo wεε ka' rìñ yuu ce wèr be loo nè Yawè àgho. <sup>27</sup> Geewa'a, Yawè à teesì ntee ese Ferò, e ke' ma'shi wowèe ene a du ka'. <sup>28</sup> Ferò à laa nè Musis enê, “Lòti efa mǎ geñ. Lòr nfè' ene à fa kèr yεeti kùntombi nè mè ka' njobè' nòn ce à ka' yεeti banε à be kwe.”

<sup>29</sup> Musis à laa enê, “Yi ku ba àmbò wè làa na! M be kè kèr yεeti ku wǎ ntombi ka'.”

# DWÀ' RFUU

## 11 Kèntàŋ ce yu rkwe nlee muu

<sup>1</sup> Awe, Yawè à laa nè Musis enê, “Ku beti ba kèntàŋ yĩ mo'sir ce m be vù àgho mbendùu Ferò ba Ijìp. Mě vù àgho, tɛ e ma'shi wèe tɛ wèe lo e àfa. E be ce mà'shi wèe ene tɛ wèe dû, ce jùu wèe jùu. <sup>2</sup> Bane à laa nè bèe Isrèl wɛwɛ ene mbanrù ñwè wɛwɛ ba njeŋwè wɛwɛ loo buu ce a gèe nè gul ba silvâ ese bèe a wăp geŋ.”

<sup>3</sup> Yawè à m fa bèe Isrèl bsii waŋ a bèe Ijìp wèe. Musis à m ba ñwè ñgòr à ñgõŋ Ijìp fon ba à bsii ñgãa mnfâ' Ferò ker ba à bsii bèe.

<sup>4</sup> Awe, Musis à laa enê, “Yawè à làa enê, ‘Be ba nè ntee tu' tɛ m fuu jèr àmù rla' Ijìp, <sup>5</sup> tɛ blee boo ce a boo mmbanrù e à ñgõŋ Ijìp wɛwɛ a kweŋger, ke' embe nlee muu yì Ferò ce e be lò ye kuu du ba' ka' mbà nlee muu yì ñkwâa ce njeŋwè ce e ke gò' baa ker ba blee boo efa mnyâa efa là' wɛwɛ. <sup>6</sup> Mwarsè mi be ba à ñgõŋ Ijìp wɛwɛ gòr sê, à ba njèe mwarsè ce mi m be ba ka', kè kèr ba ka'. <sup>7</sup> Geewa'a, ñgwe yi be kè waa ñwè mò' efa bèe Isrèl ka', ka' ñwè, ka' nyâa, tɛ wèe bo riŋ ene Yawè e ke gèe jɛɛ jɛɛ yɛɛtì àmù bèe Ijìp ba bèe Isrèl.’ <sup>8</sup> Yo ñgãa mnfâ' ca a be kè sùu vù ye mè, gu'shi nè mè ce làa enê, ‘Lò nê àfa wèe bèe ce a vù a wě mbùu wèe.’ A ba làa wa'a tɛ m lô.” Awe, Musis à fuu embe nto' Ferò nè ku' rshentee—ñwè.

<sup>9</sup> Awe, Yawè à laa nè Musis enê, “Ferò be yu' wè ka', tɛ m bo kyèse buu bbèe à ñgõŋ Ijìp.”

<sup>10</sup> Musis a Èròn a m gèe ku' buu bbèe ca wɛwɛ kùntombì nè Ferò. Geewa'a, Yawè à teesì ntee ese Ferò, e ke' ma'shi ene bèe Isrèl a fuu embe yi ñgòn ka'.

# ƉWÀ' RFUU

## 12 Yawè be càasi mndap bèe Isrèl

<sup>1</sup> Yawè à laa nè Musis a Èròn à ngõṅ Ijìp enê, <sup>2</sup> “Ɖwèe ca be ba rkè' efa mṅwèe nè wèe. Yi be ba ṅwèe entombi enjep bfè' nè wèe. <sup>3</sup> Sunj bèe Isrèl wèewe ene e ba mbe mnònṅ rrũ embe ṅwèe ca, ṅwè wèewe lor muu njèe àmbò mndap wap bta vi yu, muu njèe nje mbùundap. <sup>4</sup> Ka' ba ene mbùundap anà à sète nè muu njèe, e gap a ṅwè ce e yu à yě geṅ à ndèe bèe ce a yu mbe ndàp anà. Wèe be gáp nè bèe àmbò àde' ṅwè wèewe embe ndàp anà ye. <sup>5</sup> Ye mbu yi tur à rba yi ce yi tur rba ka', à ba bep ce yi yu fè'. Àde wèe co' embe mà njèe kè mbundoṅ è. <sup>6</sup> Wèe be lè bà' mbe mnònṅ ncòp—kyèe—à—rrũ embe ṅwèe ca, ce bèe Isrèl wèewe a be sèe yàp boo njèe à mbùunṅkùr anà.

<sup>7</sup> “Wowèe a be lòr mo' efa blèe anà yo' à bgeṅ bkènṅ e bbaa ba mbe blaṅndù' e à mndap ce wowèe a be ye mbo. <sup>8</sup> E ba nètù', wowèe a too nyàa ce a ba sèe nà, ye. A be ye à bréd ce a lè yis njo ka' ba a wep. <sup>9</sup> Wèe fa ye mò' efa gho mber kè ce a yaa yaa ka'. Geewa'a, wèe be ye ba yi ce a tòo tòo, ye nè tu ba mṅkùu ba buu enjep rbù wèewe-ṅwè. <sup>10</sup> Wèe fa mà'shi tɛ mò' efa gho beti caar bà' à ṅgàptu' ka'. Yi ce e ka' beti, wèe tóo. <sup>11</sup> A mbò wèe be ce ye ba à njèe enê, wèe be ce ye, kur ṅkànda nje bu', yar blaba' à mṅkùu kèr ghashi yè mbàṅ mbà bò. Wèe be ye cèrcer. A ṅkà' càasi mndap yi Yawè.

<sup>12</sup> “Yi be ba wa'a njobè' m be càa à ngõṅ Ijìp nètù' anà, yushi blee boo mmbaṅrù wèewe, ka' ṅwè ka' nyàa. M be sa' mnyù wèewe e à ngõṅ Ijìp. A mè Yawè. <sup>13</sup> Blèe cà vi be ba à ncòo nè wèe a mndap ce wèe ce cu. Mě ye blèe anà, tɛ m ya'ni wèe, tɛ kèntàṅ mo' yi ke' gwe mbe wèe ndùu mbe nfè' ce m ce bepsi ngõṅ Ijìp nà, yushi wèe ka'.

<sup>14</sup> “Nònṅ ca be ba nònṅ ce wèe be ce kuushi, lè yi à nònṅ ṅkà' nè Yawè. Wèe be lè yi à nònṅ ṅkà' nè yè ṅgù wèewe à ncir nfesè.

### Ɖkà' bréd ce a lè yes njo ka'

<sup>15</sup> Yawè à ker laa nè wowèe enê, “Wèe be ye bréd ce a lè yes njo ka' à mnònṅ sàambâ. E ba mbe nònṅ entombi wèe fur yes embe wèe mndap. Ɖwè ka' ye yuu ce yes yu njo kè' embe nònṅ entombi du ba' mbe mnònṅ sàambâ, banɛ a be fur ṅgàṅ e àmù bèe Isrèl. <sup>16</sup> E ba mbe nònṅ entombi ba mbe nònṅ sàambâ, wèe tartè àbee ce yu rtarshĩ rrara. Ɖwè be fà' yuu à mnònṅ anà ka'. Geewa'a, wèe be kù fèr ba byee ce

ɲwè wɛɛwɛ tɹ à rye.

<sup>17</sup> Wèe be ce ye ɲkà' bréd ce a lè yes njo ka' njobè' a nòn ce mè m fɹ wèe e à ɲgõɲ Ijip à mntè' à mntè'. Banè wèe be ye ɲkà' ca à nòn ca, lè nòn ca à ncir nè ye ɲgà wɛɛwɛ à nfè' wɛɛwɛ. <sup>18</sup> E ba mbe ɲwɛɛ entombi, ke' embe mnòn ncòp—kyèe—à—rrùu à mbùuɲkùr, te wèe ye bréd lâr yes caar du ba' mbe mnòn ncòp—mò'sir—à—mbaa embe ɲwɛɛ anà à mbùuɲkùr. <sup>19</sup> E ba à mnòn sàamba, yes fa ba a wèe mndàp ka'. Dwè ka' ye yuu ce yes yu njo, bane a be fɹ ɲwè anà e àmu bèe Isrèl, kè a ɲkèe è kè a muu rla' è. <sup>20</sup> Wèe be ye yuu ce yes yu njo ka'. Wèe be ye bréd ce yes yu njo ka' à bdi' wɛɛwɛ ce wèe ce cu.

<sup>21</sup> Awè Musis à ke' bleebèe efa bèe Isrèl a laa nè wowèe enê, “Dù nè du capshi boo njèe àmbò wee mnjèe vi yu, sɛɛ à muu njèe ɲkà' càasi mndap. <sup>22</sup> Lòr ɲku' hesòp<sup>i</sup> fɹu njep mù blɛɛ ce vi yu njep kaɲ nà, yo' à blaɲndù' ba à bgeɲ kèɲ bbaa. Mò' efa wèe fa fɹu njepmbè ka' caar ba' à ɲgàptu'. <sup>23</sup> Yi yu wa'a njobè' Yawè be ce càa à ryushi bèe Ijip, e ye blɛɛ mbe blaɲndù' ba à bgeɲ bkèɲ e bbaa, caasi ncùundù' anà, mà'shi enɛ ɲwè rbepsì niɲ mbe wèe mndàp yushi wèe ka'. <sup>24</sup> Wèe be kù ce ye ɲkà' ca te yi ba à ncir nè wèe ba boo wee nfesè. <sup>25</sup> Wèe niɲ mbe ɲgòn ce Yawè be fa nè wèe àmbò e (m) kà'ni nà, wèe ku ce ye ɲkà' ca. <sup>26</sup> Boo wee a ka' bipshi nè wèe enê, ‘Dkà' ca yi tee ba àtu ke?’ <sup>27</sup> wèe beesì nè wowèe enê, ‘A taɲshì ɲkà' càasi mndap yi Yawè, njobè' e m càasi mndap bèe Isrèl à to' Ijip mbe nfè' ce e m ce yushi bèe Ijip, geewa'a, a fɛɛsi yi mndap wer.’” Bèe Isrèl wɛɛwɛ a suu nè btu njep nshè, a gu'shi.

<sup>28</sup> Awɛ, bèe Isrèl a du a ku gee ba àmbò Yawè à m làa nè Musis a Èròn nà.

### **Rkwe boo bleɛ ce boo mmbaɲrù**

<sup>29</sup> À ka' ba nè nteetu', Yawè à yushi bleɛ boo mmbaɲrù e à ɲgõɲ Ijip wɛɛwɛ, ke' embe nlee muu yi Fèrò ce e be lò ye kɹu, du ba' mbe bleɛ boo vi bèe ce a m koo à rkòn ce a yu mbe shaɲ, ker ba bleɛ boo efa mnyàa wɛɛwɛ. <sup>30</sup> Awɛ, Fèrò a yi ɲgãa mnfà' wèe wɛɛwɛ ker ba bèe Ijip wɛɛwɛ a lɛ' nètù' anà. To' Ijip bìi a m ce warse njo' ndap mò' à m ba ce ɲwè à buu efa rkwe mbo ka'.

<sup>31</sup> Awɛ, Fèrò à toi Musis a Èròn nètù', a laa nè wowèe enê, “Wèe bèe Isrèl wèe fɹu efa mù yà bèe, du loo nè Yawè àmbò wèe à làa nà. <sup>32</sup> Lòr nè ye mbu ba ye nà' àmbò wèe à m làa nà ce duse. Ghònì nè mè foɲ!”

---

<sup>i</sup>12:22 Hesòp a njèe còcò mo' ce yi yu à ɲgõɲ Jèrusalèm

<sup>33</sup> Bèe Ijìp a m kàka ené bèe Isrèl a fùu e à yap ngòn cèrcer. Yi m ba wa'a njobè' bèe Ijìp a m làa enê, “Wèr be kwenger wèwè.” <sup>34</sup> Awè, bèe Isrèl a lor m̀k̀k̀n bréd ce a top wèe a be lè yes njo ka', a ker lor bkañ ce a ke top bréd njo a kur njep bcè', a bye'se mbe m̀k̀k̀embè'. <sup>35</sup> Bèe Isrèl a m ku gee àmbò Musis à m suñ wowèe, a laa nè bèe Ijìp ené a fa wowèe buu ce a gèe nè silv̀a ba g̀l, ker fa wowèe bcè'. <sup>36</sup> Yawè à gee bèe Isrèl a tur bsii wañ a bèe Ijìp wèe, a gee wowèe a fa buu wèwè ce bèe Isrèl a m bipshi ese wowèe. Awè, wowèe a ghup buu ese bèe Ijìp.

### **Bèe Isrèl a m fùu e à to' Ijìp**

<sup>37</sup> Bèe Isrèl a m lòti e à rla' Ramsès, a jer nè m̀k̀k̀u a du a ba' Sokòt. Mmbaṅr̀r̀ a m ba àmbò bèe nc̀k̀i-mnjèe- ntuufu(600,000) wa'a, ka' lor bbyèṅge ba boo. <sup>38</sup> Ku' kur bèe mo' ce à m ba bèe Isrèl ka' a m ko' a wowèe. A m fùu nè bku' mnyàa ce à m ba mbu ba nà'. <sup>39</sup> Wowèe a m tòò bréd ce a lè yes njo ka' nè m̀k̀k̀n ce a m v̀ àgho e à to' Ijìp nà, yes à ba njo ka' njobè' a m j̀u wowèe e à to' Ijìp j̀u, wowèe a ke' tur nfè' ce a cu fèr yuu ka'.

<sup>40</sup> Nfè' ce bèe Isrèl a m cu à to' Ijìp à m ba bfè' mnjèe kyèe nè bfè' mntaar(430).

<sup>41</sup> À ka' ba àl̀simb̀u nòn embe bfè' mnjèe kyèe nè mntaar, mntè' bèe Yawè ce a m ba à ngõṅ Ijìp a fùu à nòn anà. <sup>42</sup> A nèt̀' ce Yawè à m ce kè' à rfur bèe Isrèl e à to' Ijìp. Awè, bèe Isrèl a lè nèt̀' anà ené a nèt̀' ce ỳp ng̀ bèe wèwè be ce kè'si nè Yawè.

### **Mncir kuu ṅk̀' c̀asi mndap**

<sup>43</sup> Awè, Yawè à laa nè Musis a Èròn enê, “Cena a mncir kuu ṅk̀' c̀asi mndap, “Dwè nfuu fa ye ka', <sup>44</sup> geewa'a, ṅkwàa wèwè ce wèe à yuu nè mbàa, a gee ye bù, àde' e ku yè. <sup>45</sup> Bèe ce a bkèe ba ṅg̀a mnf̀' ce wèe ce là' wowèe là'a a be ye efa gho ka'.

<sup>46</sup> “Wèe ku tur à rye nyàa anà ba mbe nd̀p mò'sir, wèe fa fùu nè nyàa anà njepmbe ka'. Wèe fa bu' bv̀p efa gho ka'. <sup>47</sup> Bèe Isrèl wèwè a be ye ṅk̀' ca.

<sup>48</sup> “Ka' ba ené kilò be v̀ k̀ bèe cu wèe wowèe, ce kòn à rye ṅk̀' c̀asi mndap yi Yawè ca, banè wèe gee bù vi boo mmbaṅr̀r̀ wèwè. Wee gèe wèe, àde' e ko'shi àtutu ye ṅk̀' anà, te e bo ba à muu rla'. Geewa'a, ṅwè ce yu mbè'nsur be ye efa gho ka'. <sup>49</sup> Ncir yi be k̀ ba e mo'sir nè muu rla' ker ba kilò ce e ce cu a wèe mu.”

<sup>50</sup> Bèe Isrèl wèwè a m ku gee ba àmbò Yawè à m làa nè Musis a Èròn nà. <sup>51</sup> À ka' ba à nòn anà, Yawè à fùu nè bèe Isrèl e à ngõṅ Ijìp à mntè' à mntè'.

# DWÀ' RFUU

## 13 A fur yuu ce a bi entombi a le jee

<sup>1</sup> Yawè à laa nè Musis enê, <sup>2</sup> “Fur nè yuu ce a bi entombi wεwε le jee nè mè. Yuu wεwε ce a bi entombi àmù bèe Isrèl, kè à bi ηwè, kè à bi nyàa è, yu ya.”

### Dkà' bréd ce a lè yes njo ka'

<sup>3</sup> Musis à laa nè bèe Isrèl enê, “Kuushi nè nòn ca ce yu nòn ce wèe a m fuu e à to' Ijip, a fuu embe ηgòn ce wèe à m ce fà' bkwàa mbo. kuushi nè njobè' Yawè à m fur wèe e àfo nè ηger. Wèe fa ye bréd ce a lè ye njo ka'. <sup>4</sup> Wèe ce fuu ntini mbe ηwεe Abip<sup>j</sup>. <sup>5</sup> E ba mbe nfè' ce Yawè à vù nè wèe à ηgòn bèe Kenàn ba bèe Hít ba bèe Amò ba bèe Híf ker ba bèe Jebùs ce e m kàa nè wee bta enε e be fa wèe nà, ce yu ηgòn ce mmbèe nà' ba blù vi ce leη àfo leη, wèe be ce ye ηkà' ca mbe ηwεe ca. <sup>6</sup> Wèe be ye bréd ce a lè yes njo ka' à mnòn sàambâ, e ba mbe nòn sàambâ, wèe gee ηkà' nè Yawè. <sup>7</sup> Wèe be ye bréd ce a lè yes njo ka' à mnòn sàambâ. A fa ye ηwè nè bréd ce a lè yes njo ka'. A fa ye yes nè wèe à ye ηgòn ka'. <sup>8</sup> E ba nòn anà ηwè suη boo vi enê, ‘M ce gèe ca njo' yuu ce Yawè à m gèe nè mè mbe nfè' ce mè m fuu e à to' Ijip. <sup>9</sup> Ca yi be ba àmbò ncòo mbe wě rkoo wa'a, wε lõ ye ce kuushi tε à bo ce suη àmbò ncir Yawè. Yi yu wa'a njo' Yawè à fur wèe e à to' Ijip nè yi ηger. <sup>10</sup> Bane wèe be lò ce lè ncir ca mbe nfè' ce nfè' à ghεε, njep fè' njep fè'.

<sup>11</sup> “E ba mbe nfè' ce Yawè à vù nè wèe à ηgòn bèe Kenàn a fa nè wèe àmbò e m kàa nè wèe wee bta wèe nà, <sup>12</sup> wèe fur buu ce a bi entombi wεwε le jee nè Yawè. Boo nyàa ce a bi entombi wεwε ce a bduu be ba vi Yawè. <sup>13</sup> Muu jàaki' ce ma à bi entombi, a be tee nè muu mbu njèe. A ka' tε tee ka' bane a kep ndoη efa gho. À be tee muu nlee ce muu mbanrù efa boo wee ce boo mmbanrù. <sup>14</sup> Boo wo a ka' ke bipshi nè wè enê, ‘Wě gèe wa' njokε?’ A laa nè wowèe enê, ‘Yawè à m fur mè efa dì' bkwàa e à ηgõη Ijip nè ηger. <sup>15</sup> À m ba nfè' ce Ferò à m tèe tu a kani à rmà'shi wèr enε wèr dû, Yawè à yushi boo blee wεwε e à ηgõη Ijip, ka' boo ηwè ka' boo mnyàa. A mbùu ce mě ke fa tanshì nè Yawè nè buu ce a bi entombi wεwε, geewa'a, mε lò tee boo blee wa ce boo mmbanrù wεwε.’ <sup>16</sup> Ca yi be ba àmbò ncòo mbe wě rkoo ba mbe wě nsàpsi wa'a, njo' Yawè à m fur sèe e à to' Ijip nè yi ηger.”

## Bee mmbà' ba bee mor

<sup>17</sup> Ferò à ka' mà'shi bèe Isrèl enɛ a dû, Nyù à ke' caŋsi wowèe a du àgho ba njĩ à ngòŋ bèe Filesà ka', ka' nduunjì anà yi m ba lù'shi wa'a. Yi m ba wa'a njobè' Nyù à m làa enê, “Mè gèe wa'a fà dì' bèe anà a bo kupse yap ntee mbe nfè' ce a yɛ bìr, kuti à to' Ijìp ka'.” <sup>18</sup> Geewa'a, Nyù à caŋsi wowèe à nteerèŋ à mbep Rdip Rbeer. Bèe Isrèl a m fua e à ngõŋ Ijìp, a ba'shi nyor à bìr.

<sup>19</sup> Musis à m lòr bvup Josèf a du àgho njobè' e m gèe boo Isrèl a kâa, a laa enê, “Nyù be kè jà' wèe fur wèe e àfa, tɛ wèe byɛ' wa bvup e àfa ko' àgho.” <sup>20</sup> Wowèe a natĩ à ngõŋ Sokòt a ku be cu Etàm àwãa nteerèŋ. <sup>21</sup> Yawè à m ce dù kùntombĩ nè wowèe newaŋ à bee mmbà' tɛ e bo ce càŋsi wowèe, a ce dù nètù' à bee mor tɛ wowèe a bo koni rraa ce jèr nètù' ba nètù'. <sup>22</sup> Bee mmbà' e nètù' ba bee mor e nètù' vi m be lɛ'si nyor e kùntombĩ nè bèe anà ka'.

# DWÀ' RFUU

## 14 Bèe Isrèl a m ce tuu Rdip Rbeer

<sup>1</sup> Awε, Yawè à laa nè Musis enê, <sup>2</sup> “Làa tε bèe Isrèl a kuti kù be cu àgee Pai—Hàhiròt mbetar Migdòl ba rdip rgòr. Wèe be kù be cu ba àwãa rdip rgòr à ñkè'ni nè rla' Baal Sefon seesê. <sup>3</sup> Ferò be kwà' àmbò bèe Isrèl enê, ‘Bèe Isrèl a jep a ce yii/ghii/dà' à ñgòñ, nteerèñ yi cetè wowèe.’ <sup>4</sup> M be tèesi ntee ese Ferò tε e juu a wăp mbùu. M be koni fòo ñji enjep Ferò ba vi bsoogè wεwε, tε bèe Ijip a bo rìñ enε a mè Yawè”. Awε, bèe Isrèl a ku cu ba àfo àmbò a m làa nè wowèe nà.

### Bèe Ijip a m jùu àmbùu bèe Isrèl

<sup>5</sup> Dkεε e à to' Ijip à ka' yu' enε bèe anà a cañ, ye ba vi bleebèe a kupse yap ntee kuu wowèe, a laa enê, “Sèe à gèe ba ke wa'a? Sèe à mà'shi bèe Isrèl a dù, sèe à be rfà' ce wowèe a m ce fà' nè sèe!” <sup>6</sup> Awε, e ba'shi yi mutù ce à m ce sùñ ba mnyàabàrà', a lor vi bsoogè. <sup>7</sup> E m lòr mmutù cà vi mñjèe ntuunfu (600) ce vi m bòn sê, ker ba mmutù mo' e à ñgõñ Ijip wεwε, bée bgòrgor a cutè mbo wεwε. <sup>8</sup> Yawè à teesi ntee ese Ferò ce ñkεε e à to' Ijip, e juu àmbùu bèe Isrèl ce a m ce dù a ce wεp yuu mo' ka'. <sup>9</sup> Bèe Ijip ba mnyàabàrà' Ferò wεwε ba mmutù ca, ba yi ñgãa ncañ mnyàabàrà' ker ba vi bsoogè a juu àmbùu bèe Isrèl. A m dù a koni wowèe àmbò a m ku bii cu àgee rla' Pai—Hahiròt à ñkè'ni e nè Baal Sefòn nà.

<sup>10</sup> Ferò à ka' nyεε, bèe Isrèl a naa mmir a ye bèe Ijip àmbò a ce jèr ce vù mbe wăp ñji. Wowèe a wεp sê, a war nè Yawè. <sup>11</sup> Wowèe a laa nè Musis enê, “Wà' yi yu ba enε mnshè mi m ba à to' Ijip ka', wè ka' vù nè wèr à nteerèñ enε wèr kweñger a? Wè gèe ba ke nè wèr, ce a fur wèr e à to' Ijip? <sup>12</sup> Mbò wèr à m làa nè wè à to' Ijip enê, ‘Mà'shi wèr nyan, tε wèr fa' nè bèe Ijip a? Yi ba mù ba àndèe enε wèr fa' nè bèe Ijip nè ce enε wèr kweñger à nteerèñ.”

<sup>13</sup> Musis à beesì nè wowèe enê, “Fa wεp nè ka'. Tεε nè tatap tε wèe bo ye rfur ce Yawè be fur wèe ntini. Bèe Ijip ce wèe ce ye wowèe ntini na, wèe be kè ker ye wowèe ka'. <sup>14</sup> Yawè be rè nè wèe. Yi ku ba enε wèe tεε tatap.”

<sup>15</sup> Yawè à laa nè Musis enê, “Wèe ce war nè mè njokε? Làa nè bèe Isrèl enε a ce du le dù. <sup>16</sup> Nàa yò mbàñ, ma' yo bo mbendùu rdip rgòr, gapse rdip ce àde' bèe Isrèl a tuu rdip mbe nshe nyuur. <sup>17</sup> M be tèesi mntee ese bèe Ijip tε a bo dù àmbùu wowèe njo. M be gèe wa'a tε m bo koni fòo ñji enjep Ferò ba vi bsoogè wεwε, ba vi mmutù cà, kèr koni ñji enjep yi ñgãa ncañ mnyàabàrà'. <sup>18</sup> Bèe Ijip a be rìñ enε a

mè Yawè mbe nfè' ce mè koni fòo nji enjep Ferò ba vi mmutù cà, ker ba nji enjep yi ngăa ncaŋ mnyàabàrà' cà.

<sup>19</sup> Awɛ, ncindap Nyù ce e mɔ ce jèr kùntombi nè bsoogè bèe Isrèl à kuti a ce jèr ba mbe wăp nji. Bee mmbà' cà yi lo e kùntombi a tɛɛ ba mbe wăp nji, <sup>20</sup> a ce vù mbetar bsoogè bèe Ijip ba bsoogè bèe Isrèl. E ba nètù' bii, mmbà' anà vi vɔ nè tù'nji à mbèp mò', fa rraa à mbèp mò', fà dî' wèe mo' a bo vù àgee wèe mo' nètù' ka'.

<sup>21</sup> Awɛ, Musis à naa yi bo mbendù rdip, Yawè à gee nè fu' e kùmbùunti, rdip li kuti njìnjì nètù' anà, a gee nshe enjep rò à kuti à nshe nyuur, awɛ, mndip mi gapsè nyor. <sup>22</sup> Bèe Isrèl a caa nji enjep rò mbe nshe nyuur, mndip mi ko' à yàp ngù' mà' ba à yàp ngù' ñkòp a tɛɛ àmbò ngù' ndap wa'a. <sup>23</sup> Bèe Ijip a juu a wăp mbùu, mnyàabàrà' Ferò wɛɛwɛ ba mmutù cà ba ngăa ncaŋ mnyàabàrà' a niŋ àmbùu wowèe njo. <sup>24</sup> À ka' ba à mɔ nsàa tɔ' Yawè à fyɛ' bsoogè bèe Ijip embe bee mor ba bee mmbà', a gee wowèe a jep. <sup>25</sup> E m gèe mŋkar enje wap mmutù ca mi co'nger te yi bo gha' wowèe à rdòo. Bèe Ijip a laa enê, “Sèe caŋ efa gee bèe Isrèl njobè' Yawè ce rè nè wowèe kuu bèe Ijip.”

<sup>26</sup> Awɛ, Yawè à laa nè Musis enê, “Nàa yo bo mbendùu rdip te mndip mi kèr càa, cete bèe Ijip ba wap mmutù ba yap ngăa ncaŋ mnyàabàrà'.” <sup>27</sup> Awɛ, Musis à naa yi bo mbendùu rdip, tù' à ka' raa rdip li kuti mbe yě dî'. Bèe Ijip a ka' ce caŋse enjo, Yawè à yer wowèe a fa njep rò. <sup>28</sup> Mndip mi kuti njìnjì a cete mmutù cà ba ngăa ncaŋ mnyàabàrà', a fa kɔr bsoogè Ferò wɛɛwɛ ce a m ce jùu àmbùu bèe Isrèl nà njep rò. Mò' efa wowèe à m sòrti ka'. <sup>29</sup> Geewa'a, bèe Isrèl a m tuu rdip mbe nshe nyuur, mndip mi ba nè wowèe àmbò ngù' ndap wa' à yap bo mà' ba à yap bo ñkòp.

<sup>30</sup> Yawè à fur bèe Isrèl enje mmbo bèe Ijip à nòn anà, bèe Isrèl a ye bèe Ijip àmbò a kweŋger a nonŋte àwăa rò. <sup>31</sup> Bèe Isrèl a ka' ye ku' nger Yawè àmbò e dùŋshi mbendùu bèe Ijip, a wɛp Yawè, a fa bfee nè ye, a ker fa nè Musis ce a yi ñwè rfà'.

# ƉWÀ' RFUU

## 15 Yεε ce Musis a bèe Isrèl wèe a m yòp nè Yawè

<sup>1</sup> Awε, Musis a bèe Isrèl wèe a yop yεε nè Yawè a ce làa enê,  
“M be yòp nè Yawè njobè' e so nè fòo—ηwè,  
e bùr nyàabàrà' ba ηwè rcaη njep rdip gòr.

<sup>2</sup> Yawè a ya ηger, a ba ya yεε  
e yu yà ηwè rjà'.

A ye yà Nyù, m be nèsi ye,  
a ba Nyù yà tâ, m be nèsi ye.

<sup>3</sup> Yawè yu ηwè bìr,  
li rlii a Yawè.

<sup>4</sup> “E bùr mmutù Fεrò ce e ke sùη ba mnyàabàrà' ba yi ηgãa mà' bìr njep rdip gòr,  
vi blebèe mo' ce a yu à lulu a bu njep rdip gòr.

<sup>5</sup> Ku' mndip mi m ruu a cete wowèe,  
wowèe a sùu njep mbùu rò àmbò lùr wa'a.

<sup>6</sup> Oo Yawè, yo bo mà' yi tur ηger, a ba nè fòo—ηwè.  
Oo Yawè, yo bo mà' yi bu'shi ηwè bbàa.

<sup>7</sup> Wè bepsi yo ηgãa bbàa nè yo fòo ce yi yu gòr,  
a ko'si lo rshentee, li bepsi wowèe àmbò bbùshì kwaa wa'a.

<sup>8</sup> Wè m fyep rdip gòr nè mbep e kù nfènyu, li baashì nyor àbee  
a gee ku' mndip anà mi tεε àbee.

Wè gee njep ntee rdip gòr ce li coomi li ghupti.

<sup>9</sup> Ɖwè bbàa à m làa enê, ‘M be jùu wowèe, koo,  
m be gáp buu ce mè fàpshi ese wowèe, koo vì ce mè kòη.  
M be sùη yà kàafà', bepsi wowèe nè ya bo.’

<sup>10</sup> Geewa'a, wè m fyep rdip nè yò mbep, li cetè wowèe.  
Wowèe a m sùu njep rdip rgòr àmbò ryεε wa'a.

<sup>11</sup> Oo Yawè, ηwè ce e yu àmbò wè àmù mnyù a nda?  
Ɖwè ce e yu àmbò wè ce e yu nrara nè fòo—ηwè  
a ce gèe buu bbèe nè fòo—ηwè a nda?

<sup>12</sup> Wè m nàa yo bo mà',

tunshè yi mi wowèe.

<sup>13</sup> Wè càṅsi bée ce wè m tee nè lo rkòṅni ce li yu nfesè  
a ke'ni wowèe à yo ṅger caar wowèe a du a ba' mbe lo rla' ce li yu rrara.

<sup>14</sup> Bèe a yu' a ce kàṅni,  
mlù mi koo bée Fèlishà sê.

<sup>15</sup> Bkũũ e à to' Èdòm a ce wɛp,  
btunta' e à ṅgõṅ Muwàp a ce kàṅni,  
bsè vi be koo bée wɛɛwɛ e à ṅgõṅ Kɛnàn.

<sup>16</sup> Wowèe a ce wɛp a ce kàṅni.

Wowèe a tɛɛ àmbò lùr wa'a  
njo' ṅger efa lo rkoo,  
caar yò bée a vɛ càa, oo Yawè,  
caar tɛ bée ce wè m yuu a vɛ càa.

<sup>17</sup> À be vù nè wowèe, lè mbe lo rtùu,  
mbe di' ce wè gèe à lo rla',  
à ba yò ndap ce wè gèe nè mo mmbo, oo Yawè.

<sup>18</sup> Yawè be sa'  
nfesè ba à nfesè.

<sup>19</sup> Mnyàabàrà' Fèrò ba vi mmutù ce à m ce sùṅ ba mnyàabàrà' ba vi ṅgãa ncaṅ  
nyàabàrà a ka' niṅ njep rò,  
Yawè à kusi mndip,  
mi cetè wowèe,  
geewa'a, bée Isrèl a jɛr yap a tuu rdip mbe nshe nyuur.

<sup>20</sup> Awɛ, Miriyàm ce ṅwè ncep ntuu Nyù, ce e yu njàr yì Èròn a lor gàgà mbà bò,  
bbyèṅge wɛɛwɛ a lor bgàgà wap foṅ a ce bu' a ce bii. <sup>21</sup> Miriyàm à yop nè wowèe  
enê,

“Yòp nè nè Yawè, njobè' e so nè fòo—ṅwè,  
e bùr nyàabàrà' ba ṅwè rcaṅ njep rò.”

### **Yawè à m gèe mndip mcece' mi ce lèe**

<sup>22</sup> Awè, Musis à gee bée Isrèl a nati embà Rdip Rbeer a du a ba' à nteerèṅ e à  
ṅgõṅ Shù. Wowèe a m jèr à nteerèṅ à mnõṅ btaar, a koni mndip ka'. <sup>23</sup> Wowèe a ka'

và bà' Marà<sup>k</sup>, a ke' no mndip e àfo ka' njobè' mi m ce ce'e. (A mbùu ce a m too ene Marà.)<sup>24</sup> Wowèe a m de'nger nè Musis, a ce bipshi enê, “Wèr be no ba ke?”

<sup>25</sup> Awe, Musis à war nè Yawè, Yawè à duṣhì ye m̄ kùkù ntaṅguu mò', e ma' njep mndip anà, mi ce lèe.

Mbo nà a mbe di' ce Yawè à m fa wowèe ncir a suṅ wowèe àmbò a be ce cu, a taase wowèe.<sup>26</sup> E m làa enê, “Wèe ka' fa btù' yu'shi njèndonṅ Yawè ce a yè Nyà, gee yuu ce yi yu kùyee à vi bsii, ker fa btù' nè vi mncir ker lè vi weewe, banè m be mà'shi tē mo' efa byaṅ ce mè m fa nè bèe Ijìp nà yi koo wèe ka' njobè' a mè Yawè ce e ke gèe wèe ce kè'se efa byaṅ.”

<sup>27</sup> Awe, wowèe a nati à vu a ba' à ṅgõṅ Èlèm, a ye mndip ncop—baa—à—rrùu ker ba mntæe mnsàambâ, a lushì àgee rdip anà.

---

<sup>k</sup>15:23 Rlii ene Marà li yu à li Hibrù ene ‘cece’

# ƉWÀ' RFUU

## 16 Yawè à m sùusi byee embe bùu

<sup>1</sup> Bèe Isrèl wɛɛwɛ a m fuu e Elim a vu à nteerɛn Sîn, ce yi yu mbetar Elim ba Sinài. Wowèe a m fuu ba mbe mnòn ncòp-ta-à- rrùu embe nɔwɛ nòmbà baa, ce a m fuu e à to' Ijìp wɛɛ. <sup>2</sup> À ka' ba à nteerɛn, bèe Isrèl wɛɛwɛ a rù'ngèr a kuu Musis a Èròn. <sup>3</sup> Bèe Isrèl a m làa nè wowèe enê, “Yi mu bonj enɛ Yawè à mu yushi wèr à to' Ijìp. Wèr à mu ba àfo a cu àgee mntuɲ nyàa, a ce ye njèe byee ce wèr à gwɛɛ wɛɛwɛ. Geewa'a, wèe à vù nè wèr à nteerɛn ca enɛ ku' bèe ca a bo kwe njè.”

<sup>4</sup> Awɛ, Yawè à laa nè Musis enê, “Yê, m be cù' wèe bréd embe bùu. Bèe a be ce fuu à mnòn à mnòn, ce baashi àmbò yi be ghæte à nòn anà. M be gèe wa'a tɛ m bo taase wowèe tɛ m bo ye enɛ wowèe a be yu'ni nè yuu ce mè làa kè ka' lɛ. <sup>5</sup> E ba mbe mnòn ntuunfu, wowèe a laa yi ce a vù àgho tɛ yi caa yi ce a ke vù àgho à mnòn à mnòn nà ñkàrà' baa.” <sup>6</sup> Awɛ, Musis a Èròn a laa nè bèe Isrèl wɛɛwɛ enê, “Be ba à mbùunƙùr tɛ wèe riɲ enɛ a Yawè ce e m fur wèe e à ngõɲ Ijìp, <sup>7</sup> e ba à ngàptu' wèe ye fòo Yawè njobè' e yu' àmbò wèe ce rù'ngèr kuu ye. A wèr wèe kɛ ce wèe ce rù'ngèr kuu wèr.”

<sup>8</sup> Musis à ker laa enê, “Wèe be riɲ enɛ a Yawè mbe nfè' ce e fa wèe nyàa à mbùunƙùr enɛ wèe ye, a fa wèe bréd wɛɛwɛ ce wèe ce koɲ, à ngàptu' njobè' e yu' le rrù'ngèr kuu ye. A wèr wèe kɛ? Wèe ce rù'ngèr kuu ba wèr ka', wèe ce rù'ngèr kuu ba Yawè.

<sup>9</sup> Awɛ, Musis à laa nè Èròn enê, “Làa nè kɔr bèe Isrèl wɛɛwɛ enê, ‘Vù nè àtutu nè Yawè njobè' e yu' le rrù'ngèr.’” <sup>10</sup> Àmbò Èròn à ku laa nè kɔr bèe Isrèl bii nà, wowèe a ka' kè' à mbèp e à ngõɲ nsaruɲ, a ye fòo Yawè àmbò yi yɛeti nje mù mmbà'. <sup>11</sup> Yawè à laa nè Musis enê, <sup>12</sup> “Mè yu' rrù'ngèr bèe Isrèl. Làa nè wowèe enê, ‘Be ba à mbùunƙùr tɛ wèe ye nyàa, e ba à ngàptu' tɛ wèe ye bréd yu'. Yi be ba wa'a tɛ wèe riɲ enɛ a mè Yawè ce e yu yè Nyù.’”

<sup>13</sup> À ka' ba à mbùunƙùr, mmeɛngo' vi gwe a cete rla', à ka' ba à ngàptu' mmè' mi gwe a ghupti àwàa la'. <sup>14</sup> Mmè' mi ka' yuushi, yuu yi ghupti mbenduù nshe à mɲkù' à mɲkù', sir efa gho yi ke' ba gòr ka'. <sup>15</sup> Bèe Isrèl a ka' ye, a laa nè mò' ba mò' enê, “Cena a kɛ?” Wowèe a m làa wa'a njobè' wowèe a m riɲ yuu anà ka'. Musis à laa nè wowèe enê, “A bréd ce Yawè à fa nè wèe tɛ wèe bo ye. <sup>16</sup> A yuu ce Yawè à làa na, ‘Ɖwè wɛɛwɛ baashi àmbò àde' e ye. Ɖwè wɛɛwɛ lor à taasa à taasa àmbò bèe ce a wowèe a ce cu mbe yě tap a yu.’” <sup>17</sup> Bèe Isrèl a gee wa'a. Bèe mo' a baashi gòr,

wèe mo' a baashì m̀càr. <sup>18</sup> A ka' fè' à btaasa à btaasa, ɲwè ce e m̀ baashi gòr, ber yi beti ka', ɲwè ce e m̀ baashi yi m̀càr, yi ke' setè ka'. D̀wè wèwè à m ku baashi àmbò àde' e ye. <sup>19</sup> Musis à laa nè wowèe enê, “D̀wè fa ber mo' efa gho caar te yi ba' à ɲgàptu' ka'.” <sup>20</sup> Yi m ba wa'a, bèe mo' a ke' fa bfee à yuu ce Musis à m làa ka', a ber mo' yi ba' à ɲgàptu', m̀ɲgũur mi niɲ njo, yi ke' a ce r̀u. Ntee yi yaɲ Musis nè wowèe. <sup>21</sup> D̀wè wèwè à m ce baashi à ɲgàptu' à ɲgàptu' àmbò àde' e ye, geewa'a, nyù e saɲ ce tòoni, yi yeeɲgèr wèwè.

<sup>22</sup> À ka' ba mbe mnòɲ ntuunfu, wowèe a baashì brèd à btaasa bbaa bbaa nje tu ɲwè. Btu efa kur bèe Isrèl wèwè a ka' v̀ suɲ nè Musis, <sup>23</sup> e laa nè wowèe enê, “A yuu ce Yawè à làa na, ‘Àyàɲsè be ba nòɲ rl̀shi, nòɲ mmbomntaa rara nè Yawè. Tòò nè yì ce àde' wèe t̀o, yaa yì ce àde' wèe ỳa. Ber nè yì ce yi beti wèwè, le caar ba' à ɲgàptu'.”

<sup>24</sup> Awè, wowèe a ber caar a ba' à ɲgàptu' àmbò Musis à m̀ laa nè wowèe nà. Yi ke' ce r̀u ka', m̀ɲgũur mi niɲ njo ka'. <sup>25</sup> Musis à laa enê, “Wèe ye ntini njobè' ntini a mmbomntaa nè Yawè. Wèe be kèr ye mmo' à nshè ntini ka'. <sup>26</sup> Wèe be baashi à mnòɲ ntuunfu, geewa'a, e ba mbe nòɲ sàamba ce a mmbomntaa te mo' yi ker ba ka'.”

<sup>27</sup> À ka' ba mbe nòɲ sàamba bèe mo' a fuu a du à rbaashì, geewa'a, a du a ye yuu ka'. <sup>28</sup> Awè, Yawè à laa nè Musis enê, “Wèe be kani à ryu' buu ce mè làa, kèr kani à rlè wa mncir dù bà' fè? <sup>29</sup> Yè, mè fa wèe nòɲ mmbomntaa, a mb̀u ce e ba mbe mnòɲ ntuunfu m fa wèe brèd à mnòɲ bbaa. D̀wè wèwè cu mbe dì' ce e yu. ɲwè fa nàti embe yè dì' mbe nòɲ sàamba ka'.” <sup>30</sup> Awè, bèe anà a lushì mbe nòɲ sàambà.

<sup>31</sup> Bèe Isrèl a m too brèd anà ene manà. Yi m ba àmbò mbàɲ kòriyandà<sup>1</sup> wa'a, a ba buu, a ce yu'ti kù c̀u àmbò wafà<sup>m</sup> ce a kupshi nè bl̀ wa'a. <sup>32</sup> Musis à laa enê, “A yuu ce Yawè à làa na, ‘Lòr nè manà à taasa, ber nè ye ɲg̀ bèe ce a bii v̀ te wowèe a bo kè ye brèd ce mè m nyaɲ wèe àgho à ɲgõɲ nsaruɲ mbe nfè' ce mè m fur wèe e à to' Ijip.” <sup>33</sup> Awè, Musis à laa nè Èròn enê, “Lòr manà à taasa le njep ntɲ, fa kùntombi nè Yawè te a bo ber nè yè ɲg̀ ce e bii v̀.” <sup>34</sup> Èròn à le manà anà kùntombi nè ɲk̀p mncir te a bo ber àmbò Yawè à m làa nè Musis nà.

<sup>35</sup> Bèe Isrèl a m ye manà à bfè' m̀kyèe caar a v̀ a ba' mbe dì' ce bèe a m nòɲ. Wowèe a m ye manà anà caar a v̀ a ba' mbe ndèeɲgòn Kenàn. <sup>36</sup> (Taasa anà à m ba dì' e mo'sir efa bdi' r̀u efa efà.<sup>n</sup>)

<sup>1</sup>16:31 Kòriyandà à m ba m̀ njèe c̀cò mo' ce ɲg̀ efa gho à m ce bàɲre

<sup>m</sup>16:31 Wafà à m ba njèe byee mo' ce e m ba àmbò Biskit wa'a

<sup>n</sup>16:36 Efà a yuu ce bèe Hibr̀s a m ce fè' buu njo

# ƆWÀ' RFUU

## 17 Nyù à m gèe mndip mi fuu enje ryεε

<sup>1</sup> Rla' Isrèl rbii li m fuu e à ngõŋ nsaruŋ e Sîn, a ce jèr, lo embena du mbena àmbò Yawè à m làa. Wowèe a m dù a ku be cu Rεfεdim, geewa'a, mndip mi ke' ba ne wowèe à rno ka'. <sup>2</sup> Awe, wowèe a lapni Musis, a laa enê, “Fa wèr mndip tε wèr no.” Musis à laa nè wowèe enê, “Wèe ce lapni mè njokε? Wèe ce taase Yawè njokε?” <sup>3</sup> Geewa'a, ntee mndip yi luu bèe anà àfo, wowèe a ce ru'ngèr nè Musis a laa enê, “Wè m fur wèr boo wer wèe, ba yer nyàa e à to' Ijip ene wèr kwe ntee mndip njokε?” <sup>4</sup> Awe, Musis à war nè Yawè, a laa enê, “M gee mε ke nè bèe ca? Wowèe a tami nyor à rtuushi mè nè blur.” <sup>5</sup> Yawè à beesì nè Musis enê, “Jèr dù kùntombi nè wowèe. Lòr bleebèe mo' efa mε bèe Isrèl, lor mbàŋ ce wè mε lip rdip Nai àgho nà nje bò, dù. <sup>6</sup> Yê, m be tεε àfo kùntombi nè wè mbendùu ryεε e Horèp, tε à kuu ryεε tε mndip mi fuu enjo nè bèe tε a no.” Musis à gee à bsii bleebèe e Isrèl wa'a. <sup>7</sup> A ka' gèe wa'a, a too rlii dì' anà ene Masà<sup>o</sup> a ker too ene Meribà<sup>p</sup> njobè' bèe Isrèl a m lapni ye àfo, a ker mooshi Yawè àfo, a ce làa enê, “Yawè yu a wër mε kè e yu ka'?”

### Bèe Isrèl a m so bèe Amalèk

<sup>8</sup> Awe, bèe Amalèk a vu a mà' bìr a bèe Isrèl wèe à ngõŋ Rεfidim. <sup>9</sup> Awe, Musis a laa nè Joshùwà enê, “Ce visèe mmbaŋrù mo' tε wèe wowèe fuu dù rè bèe Amalèk. Be ba àyànse tε m tεε mbe tu rtùu, ghashi mbàŋ Nyù nje mē bò.” <sup>10</sup> Awe, Joshùwà à gee àmbò Musis à làa nè ye, a re a bèe Amalèk wèe, Musis ba Èròn ba Hor a ko' yap ba mbe tu rtùu. <sup>11</sup> Tètè àmbò Musis à ghashi mi mmbo mbekì, banε bèe Isrèl a be ce so. E ba à nfè' ce e sùusi mi mmbo, banε bèe Amalèk a be ce so. <sup>12</sup> Geewa'a, mŋkoo Musis mi ka' tàte, wowèe a lor lùr a le njep yě tii, e cu mbendùu mo, Èròn ba Hor a ghashi mi mŋkoo mbekì, mò' à mbèp mò', mò' à mbèp mò'. Awe, mi mŋkoo mi ku cu ŋkëŋŋkëŋ caar nyù a du à du a coo. <sup>13</sup> Awe, Joshùwà à so bsoogè bèe Amalèk nè kàafà'.

<sup>14</sup> Awe, Yawè à laa nè Musis enê, “Saŋ yuu ca mbe ŋwà' à yuu mo' ce a be lò ce kuushi. Ye ene Joshùwà à yu' yi njobè' m be siŋsi bèe Amalèk enjep tii rbuu wàwà, ce àde' ŋwè ke ker kwa'shi àmbò wowèe ka'.” <sup>15</sup> Musis à boo dì' ntoo rfa mbo, a too

---

<sup>o</sup>17:7 Rlii ene Masà li yu à li Hibrù ene ‘Rmòoshi’

<sup>p</sup>17:7 Rlii ene Meribà li yu ene ‘Mnlapni’

ene “Yawè yu ya Tùtuwà”, <sup>16</sup> a ce làa enê, “A nàa bo mbe kàbàrà' Yawè! Yawè be mà' bìr a bèe Amalèk wèe, ke' embe ñgù bèe mò' dù bà' mbe mò'.”

# DWÀ' RFUU

## 18 Jetrù à du a ca'ni Musis, a cep ye

<sup>1</sup> Jetrù ce ɲwè taŋshi taŋshi e à ɲgõŋ Mediyàn, a ba talu yi Musis, à yu' yuu wɛwɛ ce Nyù à m gèè nè Musis ba nè yi bèè ce bèè Isrèl. E m yu' àmbò Yawè à m fūr bèè Isrèl e à to' Ijìp. <sup>2</sup> Musis à ka' tuusi ɲgwa yi ce Siporà wɛɛ, talu yi ce Jetrù à koni ye, <sup>3</sup> ker ba boo vi ce boo mmbaŋrù a baa. A m ce too muu yi mò' ene Geshòm njobè' Musis à m làa enê, “M yu kilò mbe nshe bèè mò'.” <sup>4</sup> A m ce too mò' ene Èliesà njobè' Musis à m làa enê, “Nyù yà ta a ɲwè ce e m jà' mè, a fɛesi mè efa kàafà' Ferò.” <sup>5</sup> Jetrù ce talu yi Musis ba boo mmbaŋrù vi Musis a baa, ba ɲgwa yi Musis a vù a ye ye à ɲgõŋ nsaruŋ mbe di' ce e m ku be cu, àgee rtùu Nyù. <sup>6</sup> Jetrù à m bani cep ntuu nè ye enê, “Mè ce talu wò ce Jetrù, m ce vù à ryɛ wè wè ɲgwa wo ba boo vi ce boo mmbaŋrù a baa.” <sup>7</sup> Musis à fũ à rkoni talu yi, a gu'shi, a nyo'shi ye. Wowèè a ja'ni mnyor, a niŋ mbe tàp. <sup>8</sup> Awɛ, Musis à suŋ talu yi buu wɛwɛ ce Yawè à m gèè nè Ferò ba nè bèè Ijìp àtu bèè Isrèl. E m suŋ ku' ɲge' ce wowèè a m ye à nduunji, a suŋ àmbò Yawè à m fūr wowèè enjo. <sup>9</sup> Jetrù à m yu' rbòŋ à ryu' buu bbòŋboŋ ce Yawè à m gèè nè bèè Isrèl wɛwɛ, ce yu rfūr ce e m fūr wowèè embà mmbo bèè Ijìp.

<sup>10</sup> Jetrù à laa enê, “Bkù'si vi ba nè Yawè ce e fūr wèè embà mmbo bèè Ijìp, ba embà mmbo Ferò, a fūr bèè ca embà mmbo bèè Ijìp. <sup>11</sup> Mè riŋ sè'ni ene Yawè à càa mnyù wɛwɛ njobè' e m gèè ca ba nè bèè ce a m ko' bèè Isrèl nè mɲkùu mbe tù.” <sup>12</sup> Jetrù ce talu yi Musis à vù nè rfa rtòo ba btaŋshi nè Nyù. Èròn à vù a bleebèè wɛwɛ efa bèè Isrèl à rvù ye bréd a talu yi Musis wèè a bsii Nyù.

<sup>13</sup> Tù' à ka' raa, Musis à lor yi nta' à ɲwè ce e ke sa' bèè, wowèè a tɛɛ a gaŋ ye ke' e à ɲgàptu' a du a ba' à mbùuŋkùr. <sup>14</sup> Talu yi Musis à ka' ye yuu wɛwɛ ce Musis ce gèè nè bèè, a bipshi enê, “À ce gèè ba ke nè bèè wa'a? À cu momŋgi' a ce sa' mnsa', bèè ca wɛwɛ a tɛtè a gaŋ wè ke' e à ɲgàptu' du ba' à mbùuŋkùr njokɛ?” <sup>15</sup> Musis à laa nè talu yi enê, “Yi yu wa' njobè' bèè anà a vù ce ye mè tɛ a bo ròo yuu ce Nyù ce kòŋ. <sup>16</sup> E ba nfè' ce wowèè a tɛr nfàani bcùu, a vù àgho nè mè, m teni nè wowèè wɛwɛ, gee tɛ wowèè a riŋ mncir Nyù ba yuu ce Nyù à làa.”

<sup>17</sup> Talu yi Musis à laa nè ye enê, “Yuu ce à ce gèè anà yi bòn ka'. <sup>18</sup> Wèè bèè ce a ce vù ce ye wè na, wèè ce sèesi ba wee mnyor. Rfà' anà li rèr a caa wè, àde' à gee rli momŋgi' ka'. <sup>19</sup> Yu' yuu ce m be làa sè'ni. M be fa wè ncep. Nyù ba wèè ye. À be tɛɛ àtu bèè ca kùntombi nè Nyù, vù nè map mnsa' nè ye. <sup>20</sup> À be ye'ni wowèè mncir Nyù ba yuu ce e làa, gèè tɛ wowèè a riŋ njèè nji ce wowèè a tɛr à rjèr ba yuu ce

wowèe a tɔr à rgèe. <sup>21</sup> Fyɛ' mmbaŋrù ce a ghɛete, efa mù bèe ca wɛɛwɛ, tɛ ba bèe ce a ce wɛp Nyù, a ba mini, a baa sɛ' cici. Lè wowèe mbendùu bèe ca, tɛ a ba à btu nè bèe mncùkì mncùkì, ba nè bèe mnjèe mnjèe ba nè bèe mnta mntâ, ker ba nè bèe nrɔɔ nrɔɔ. <sup>22</sup> Mà'shi tɛ wowèe a ce sa' mnsa' bèe ca à nfè' wɛɛwɛ. Nsa' ce e ka' tap wɛɛwɛ, wowèe a vɔ àgho nè wè, geewa'a, nsa' ce e yu àtɛr, wowèe a sa' a wǎp mɔ. À be gèe wa'a, tɛ yo ntèr yi fɛpni njobè' wè gáp wèe wowèe. <sup>23</sup> À ka' gee wa'a, bane Nyù be nàshi wè tɛ à ker yu nyor ka', tɛ bèe ca wɛɛwɛ a kuti à là' nè cumɔnyɔŋ-ŋwè.”

<sup>24</sup> Musis à yu' yuu ce talu yì à làa, a gee yuu ce e làa wɛɛwɛ. <sup>25</sup> Musis à ce mmbaŋrù ce a ghɛete efa mù bèe Isrèl wɛɛwɛ, a gee wowèe à btu mbendùu bèe anà. Wowèe a m ba à btu mbendùu bèe mncùkì mncùkì, a ba à btu mbendùu bèe mnjèe mnjèe, a ba mbendùu bèe mnta mntâ, a ker ba mbendùu bèe nrɔɔ nrɔɔ.

<sup>26</sup> Bèe ca a m ce sa' mnsa' bèe à nfè' wɛɛwɛ. A m ce vɔ nè mnsa' ce mi tap, fa nè Musis, geewa'a, teni mi ce mi yu àtɛr a wǎp mɔ.

<sup>27</sup> Awɛ, Musis à ma'shì talu yì, e kuti fa yě to'.

# ƆWÀ' RFUU

## 19 Bèe Isrèl a m ba mbe rtùu Sinài

<sup>1</sup> À ka' ba mbe ɲwɛɛ btaar ce bèe Isrèl a m fuu e à ɲgõɲ Ijìp wɛɛ, wowèe a vu a ba' à nteerèɲ e à ɲgõɲ Sinài à nònɲ anà. <sup>2</sup> Wowèe a m nàti e à ɲgõɲ Rɛfidim, a vu a niɲ à nteerèɲ Sinài, a ku be cu à nteerèɲ anà. Bèe Isrèl à m vù a ku be cu kùntombi nè rtùu, <sup>3</sup> Musis à ko' mbe rtùu à rdù ye Nyù. Yawè à kɛ' ye embe rtùu a laa enê, “A yuu ce à be làa nè ndap Jakòp kèr suɲ bèe Isrèl na, <sup>4</sup> ‘Wee wèe à ye yuu ce mè m gèe nè bèe Ijìp, a ye àmbò mè m byè' wèe mbe bbàp àmbò wàawa mɲkùr wa'a, a vu àgho nè mè. <sup>5</sup> Banɛ sè'ni wèe ka' yu'ni nè mè, lɛ ya lè', banɛ m be lòr wèe à yà bèe ce a yu à lulu e àmù bèe wɛɛwɛ njobè' tunshè a ya. <sup>6</sup> Wèe be ba nè mè à ndù'kɛu ɲgãa taɲshi taɲshì ker ba to' rara.’ Ca a blàa ce à be dù làa nè bèe Isrèl.”

<sup>7</sup> Awɛ, Musis à sùu, a kɛ'shi blebèe e àmù bèe Isrèl, a suɲ wowèe buu wɛɛwɛ ce Yawè à ba laa nè ye enɛ e làa. <sup>8</sup> Bèe wɛɛwɛ a beesì àbee a laa enê, “Wèr be gèe yuu wɛɛwɛ ce Yawè à làa!” Awɛ, Musis à kuti a du a suɲ Yawè yuu ce wowèe a làa.

<sup>9</sup> Yawè à laa nè Musis enê, “Yê, m ce vù ye wè enje mù bee mmbà' tɛ bèe a bo yu' àmbò m ce de' wèe sò tɛ a bo byemi wè nfesè.”

Musis à ka' suɲ buu ce bèe anà a làa nè Yawè, <sup>10</sup> Yawè à laa nè Musis enê, “Dù du gee tɛ bèe anà a raasi wap mnyor ntini ba àyàɲsè, su'si wap bcè', <sup>11</sup> tami nyor mbe mnõɲ btaar. E ba mbe nònɲ anà, tɛ Yawè suu mbe Rtùu Sinài à bsii bèe wɛɛwɛ. <sup>12</sup> À be tee ndèe sùr rtùu àgho ese bèe wɛɛwɛ, làa nè wowèe enê, ‘Lòr nè nfè' fà dì' wèe ko' mbe rtùu kè jòo bgeɲ efa gho ka'. Ɖwè ce e ka' joo rtùu anà, banɛ a be yu ye. <sup>13</sup> Ɖwè be jòo ɲgàɲ (nè bo) ka', geewa'a, a be tɛuushi ye nè blùr, ta ye nè mɲjɛɛ. Ka' ɲwè ce e jòo rtùu, ka' nyàa, mò' be cu ntèe ka'.’ Rsònɲ li ka' laa sapni, wowèe a ko' mbe rtùu.”

<sup>14</sup> Awɛ, Musis à suu embe rtùu, a ye yì bèe, a gee wowèe a raasi wap mnyor, wowèe a su'si wap bcè'. <sup>15</sup> E laa nè bèe anà enê, “Tami nè nyor mbe nònɲ e btaar, ɲwè fa nònɲ a njeɲwè ka'.”

<sup>16</sup> À ka' ba à ɲgàptu' embe mnõɲ btaar anà, mbèɲ à rɛuɲgèr, sa'mbèɲ à bapɲgèr, bee mmbà' yi yeɛtì mbe rtùu, rsònɲ li laa mbeki sê, a gee bèe wɛɛwɛ a kaɲni mbe dì' ce wowèe a ba ce lùshi nà. <sup>17</sup> Awɛ, Musis à caɲsi wowèe e fàdì' ce a ba ce lùshi nà enɛ a bo dù tarte a Nyù wèe. Wowèe a du a tɛɛ njep mbùu rtùu. <sup>18</sup> Njemor yi m cete Rtùu Sinài wɛɛwɛ njobè' Yawè à m sùu mbo à mor. Njemor anà yi m ko' àmbò njemor nlàa wa'a. Rtùu rbii li ci'ti nè ɲger—ɲwè sê. <sup>19</sup> Rsònɲ li ka' kù ce làa ce ko',

awɛ, Musis à lâa, Nyù à beesi ye njĩ à sa'mbèn.

<sup>20</sup> Yawè à suu mbe tu Rtùu Sinài, a ke' Musis mbe tu rtùu anà, Musis à ko' mbo.

<sup>21</sup> Awè, Yawè à laa nè Musis enê, “Sùu du bæ bæ anà fà dì' ce wowèe a lo teese ndèe ce ghèter enɛ a ba ye Yawè tɛ bèe gòr efa wowèe a kweŋger ka'. <sup>22</sup> Bæ ngăa taŋshi taŋshì ce a ke vù àtutù Yawè enɛ a raasi wap mnyor foŋ fà dì' Yawè lo fũu bepsi wowèe ka'.”

<sup>23</sup> Musis à laa nè Yawè enê. “Àde' bèe anà a ko' mbe Rtùu Sinài ka' njobè' à m ku bæ wè a bæ wèr enɛ wèr tee ndèe, sir rtùu, ma'shi li tɛ li ba rrara.”

<sup>24</sup> Yawè à laa nè ye enê, “Sùu, du ko' wèe Èròn. Geewa'a, fa mà'shi enɛ ngăa taŋshi taŋshì a bèe anà wèe a gheter à rvù ye Yawè ka', fà dì' e fũu bepsi wowèe ka'.”

<sup>25</sup> Awɛ, Musis à sũu, a du a ye bèe anà, a suŋ wowèe yuu ce Yawè à ba lâa.

# ƉWÀ' RFUU

## 20 Mncir Nyù vi rûu

<sup>1</sup> Awε, Nyù laa blàa ca wεεwε enê,

<sup>2</sup> “A mè Yawè ce m yu yè Nyù ce e m fur wèe e Ijip ce a ngòn bkwàa.

<sup>3</sup> “Wèe fa tur mnyù mo' caa efa mè ka'.

<sup>4</sup> “Wèe fa sò' blaŋ à wee ka', ka' koŋ yi feesè yuu mo' embe bùu, ka' yuu mo' enjep ngòn, ka' yuu mo' ce yi yu njep rdip enjep bùu nshe è, ka'. <sup>5</sup> Wèe fa gu'shi kè loo nè vi ka' njobè' a mè Yawè ce m yu yè Nyù, ma mmir mi yu mbe wée ndùu sê. Mε ke mà' ηγε' nè boo ba mmbishì ba mntuŋnyer efa bèe ce a bàa mè. <sup>6</sup> Geewa'a, mε ke dùŋshi rkòŋni ce nfesè du ba' mbe ηγù bèe vi ncùki efa bèe anà ce a kòŋ mè a ce lè wa mncir.

<sup>7</sup> “Wèe fa ke' rlii Yawè ce e yu yè Nyù à cici ka' njobè' Yawè be buu efa rmà' ηγε' nè ηwè ce e ke' li rlii à cici ka'.

<sup>8</sup> “Kuushi nè à rcu mmbomntaa Nyù, gee te nòn anà yi ba rara. <sup>9</sup> Wèe be gèe wee mntà'tè ba ker ba me mnfà' wεεwε à mnòn ntuunfu, <sup>10</sup> geewa'a, nòn sàamba a nòn yi Yawè ce e yu yè Nyù. Wèe fa fà' yuu à nòn anà ka', ka' wèe ka' boo wee ce boo mmbaŋrù, ka' wee boo bbyènge, ka' ye ηwè rfà' ce mbàŋrùŋwè ka' yè ηwè rfà' ce njeŋwè foŋ, ka' ye nyàa, ka' ηwè ce a kilò a wée là'. <sup>11</sup> Yi yu wa'a njobè' Yawè à m lòr mnòn ntuunfu a gee rbuu ba nshe ba mndip mŋgòŋgòr ba buu wεεwε ce vi yu à bdi' anà, à ka' ba mbe mnòn sàamba e lushì. A mbùu ce Yawè à m ghòni nòn mmbomntaa, a gee yi ba rara.

<sup>12</sup> “Yu'ni nè yò ta ba yò mâ, te à bo cu à ngòn ce Yawè ce e yu yò Nyù ce fa nè wè nà, tètè.

<sup>13</sup> “Ɖwè fa yu ηwè ka'.

<sup>14</sup> “Ɖwè fa koo ηgwa ηwè ka'.

<sup>15</sup> “Ɖwè fa yèε ka'.

<sup>16</sup> “Ɖwè fa tee njinsa' mnàn nè ηwè mò' ka'.

<sup>17</sup> “Ɖwè fa gani ndap ηwè mò' ka', ηwè fa gani ηgwa ηwè mò' ka', kè yì ηwè rfà' ce mbaŋrùŋwè, kè yì ηwè rfà' ce njeŋwè è. Ɖwè fa gani nà' kè jàaki' kè ka' ke wee ce a yì ηwè mò' ka'.”

<sup>18</sup> Bèe anà wεεwε a ka' yu' àmbò mbèŋ ce waa, ye àmbò sa'mbèŋ ce bàŋŋger, yu'

àmbò rsòŋ li ce làa, kèr ye àmbò njemor yi ce dũ' embe rtùu, a wɛp a ce kàŋ, a tɛɛ à njìsàp. <sup>19</sup> Awɛ wowèe a laa nè Musìs enê, “Kù ce laa ba wè nè wèr tɛ wèr yu'shi. Fa ma'shi tɛ laa ba Nyù nè wèr ka', ka' laa ba ye, banɛ wèr be kwɛŋger.” <sup>20</sup> Musìs à laa nè wowèe enê, “Fa ce wɛp nè ka', Nyù à vù à rtaase wèe, tɛ wèe bo ce wɛp ye, kè' gèe yuu bebep ka'.” <sup>21</sup> Bèe anà a ku tɛɛ njìsàp, Musìs à ko'shì àtutu bee mmbà' fàdì' ce Nyù à m ba.

### **Mncir du kuu dì' taŋshi taŋshì**

<sup>22</sup> Awɛ, Yawè à laa nè Musìs enê, “Làa nè bèe Isrèl enê, ‘Wèe à ye nè me mmir àmbò mè de' nè wèe embe bùu. <sup>23</sup> Wèe a fa kupshi mnyù nè silvà kè gul ce loo àgho kèr ce loo nè mè ka'.

<sup>24</sup> ‘Boo dì' taŋshi taŋshì nè mè nè nshe, taŋshi taŋshì tòo ba taŋshì ce yi ce vù nè cumunyaŋ mbo nè mbu ba nà'. À bdi' wɛɛwɛ ce m ka' gee bèe a ce kuushi mè, banɛ m be sùu ye wèe, ghòni wèe. <sup>25</sup> À ka' boo dì' taŋshi taŋshì nè mè nè blùr, à fa boo nè blùr ce a bæe ka' njobè' à ka' bæe blùr anà nè yuu rfà', banɛ wè bepsi dì' anà. <sup>26</sup> Fa boo ya dì' taŋshi taŋshì tɛ yi sap mbeki ce a be ce ko' mbo ko' ka', fa dì' ŋwè taŋshi taŋshì e lò ce ko' mbo, yì mbùuriŋ bo yɛeti ka'.

# SÂM

## 2 Rsa' ηwè ce Yawè à yo'

<sup>1</sup> Ntee yi ce yaη bto' mo' njokε?

Bèe a ce cu mncù à yuu ce yi be fà' ka' njokε?

<sup>2</sup> Bkuu embe tunshè a ce ba'shi nyor,

ηgãa rsa' a ce fa mntaη àbee à rrè Yawè ba yì ηwè ce e yo'.

<sup>3</sup> Wowèe a ce làa enê, “Sèe sor visèe mnyor enje wap mmbo, fyεeshi bkù ce wowèe a kur sèe àgho.”

<sup>4</sup> Dwè ce e cu ba mbe bùu nà ce fye' ce vùshi vùshi.

Tata ce bù' wowèe.

<sup>5</sup> E be làa nè wowèe nè ncepntee—ηwè,

wεpsi wowèe nè li rshentee, ce làa enê,

<sup>6</sup> “À ka' ba yi àmbò mè,

mè ghar yà ηkuu mbe Sayòn, ce a la rtùu ce li yu rrara.”

<sup>7</sup> Dkuu à làa enê, “M be suη àmbò rsa' Yawè:

Yawè à m làa nè mè enê, ‘À yu muu wà,

ntini na m yu yò tâ.

<sup>8</sup> Bipshi nè mè te m gee te bto' ca wεεwε vi ba wo bti',

tunshè bli be ba yo.

<sup>9</sup> À be bu'shi wowèe nè mbàη co',

da'si wowèe à bbεbε' à bbεbε' àmbò a le rkìη nshe wa'a.”

<sup>10</sup> Banε àmbò yi yu wa' na, wée bkuu, wèe ba nè bfee—ηwè sè'ni,

wèe ηgãa rsa' embe tunshè, lór nè nfè'.

<sup>11</sup> Fà' nè nè Yawè nè rwεp—ηwè,

ce lu'shi à yuu ce e gèe, ce kaηni ku yě ntombi.

<sup>12</sup> Nyò'shi nè muu mbaηrù anà,

fà dì' ntee yi bep ye, te wèe kwεnger à njèe nji ce wèe ce dù ka', njobè' e ke ko'si rshentee cεrcer.

Mmbõηtu mi yu nè bèe wεεwε ce a surni njep yě tii

# SÂM

## 3 Oo yà Nyù, jà' mè

<sup>1</sup> O Yawè, ya ngăa bbàa a yu gòr,  
bèe gòr a ce rè mè.

<sup>2</sup> Bèe gòr a ce làa àmbò mè enê,  
“Nyù be jà' ye ka!”

*selà*

<sup>3</sup> Oo Yawè, geewa'a, a wè byeëbìr ce yi te'shi mè,  
à ba wè ya fòo, a ba ñwè ce e ke nàa mè mbekì.

<sup>4</sup> Mè m war mbekì nè Yawè,  
e beesì mè embe li rtùu ce li yu rrara.

*Selà*

<sup>5</sup> Mè ke nòn buumi,  
ker le' ñjobe' a Yawè e ce kè'ni mè.

<sup>6</sup> M be wep ku' mncùkì bèe,  
ce a sir mè a tarte a ce rè mè nà ka'.

<sup>7</sup> Oo Yawè, nàti! Oo yà Nyù, jà' mè!  
Wè ke wen ya ngăa bbàa wëwë à gè', bu'shi mnsòn esè bèe ce a ce gèe  
bbebep nè mè.

<sup>8</sup> Yawè, a wè ce wè ke jà' bèe,  
gèe tē wo bghònì vi ba nè yò bèe!

*Selà*

# SÂM

## 4 Bèesi mè mbe nfè' ce mè kε' wè

<sup>1</sup> Oo Nyù ce e gèe mè ba kùyeε, bèesi mè mbe nfè' mε kε' wè.

Mè m ba njep mlù, wè gee mè wasè.

Koosi mnse nè mè, yu' la rloo!

<sup>2</sup> Oo bèe, ya fòo yi be kuti ba à rètu dù bà' fε?

Wèe be kòn blàa cici dù ba àmbù mnde' dù bà' fε? Sèlà

<sup>3</sup> Rìj nè enε Yawè à ce bèe ce a wεp ye a lε jεε à yì bèe.

Yawè e ke yu' mè mbe nfè' ce mè war nè ye.

<sup>4</sup> Ntee yi ka' bep ηwè, e fa gèe yuu bebep ka',

kwà'shi nè àghò njep wèe mntee à wee bkuu, cu munyaη.

*sèlà*

<sup>5</sup> Gèe nè btaηshì ce vi yu yeεni Yawè,

fa bfee nè ye.

<sup>6</sup> Bèe gòr a ce bipshi enê, “A nda ce àde' e gèe yuu bònboη nè wèr?”

O Yawè, gèe tε rraa efa wo bsii li raa mbe wër ndù!”

<sup>7</sup> Wè fa rlu'shì njep mē ntee,

a caa li bèe a ke lu'shi mbe nfè' ce a koni ku' byee ba ku' mrù'.

<sup>8</sup> M be nòn buumi nè cumunyaη—ηwè,

njobè' ku ba wè ce à ce tε'shi mè, oo Yawè.

# SÂM

## 5 Rloo ene à tɛɛ njep nduunjì Yawè ce yi yu kùyeɛ

<sup>1</sup> Oo Yawè, fa tù' nè yuu ce m ce làa,  
yu' àmbò m ce shoonger.

<sup>2</sup> Ya ŋkɛɛ ker ba yà Nyù,  
yu' àmbò m ce war,  
njobè' m ce loo ba nè wè.

<sup>3</sup> Oo Yawè, wɛ ke yu' yà njendonɔ̄ à ŋgàptu',  
mɛ ke gèe taŋshì nè wè à ŋgàptu' ce kè' ene à beesì mè.

<sup>4</sup> À yu Nyù ce wɛ ke yu' rbòn nè bsãrbuu ka',  
àde' à raasi yuu bebep a wě geŋ ka'.

<sup>5</sup> Àde' ŋgãa nàanyor a be kè tɛɛ à wě bsii ka',  
wè bàa ŋgãa ŋgèe buu bbebep wɛwɛ.

<sup>6</sup> Wɛ ke bepsi ŋgãa nya' mnde',  
Yawè e ke jàasi ŋgãa nyushi bèe ker ba ŋgãa mmo'ni.

<sup>7</sup> Geewa'a, à ka' ba yi àmbò mè, m be niŋ mbe wě ndàp njobè' lo rkòŋni ce nfesè  
ce li yu rgòr.

M be gu'shi ce kè' yò ndap ce e yu nrara nè rwɛp—ŋwè.

<sup>8</sup> Oo Yawè, càŋsi mè tɛ m tɛɛ njep yo nduunjì ce yi yu kùyeɛ njo' ya ŋgãa bbàa.  
Gèe tɛ yo nduunjì yi ba kùyeɛ nè mè.

<sup>9</sup> Mini yu ku wǎp cùu ka' koo mɛcàr.

Yap ntee yi ku kòn ba à rbepsi yuu,  
lap rkàkàr li yu rtoo àmbò rshè ce àde' li mi ŋwè wa'a.  
Wowèe a ke ye rlee.

<sup>10</sup> Oo Nyù, teni map mnsa' tɛ wowèe a niŋ ŋgɛ'.

Gèe tɛ mntaŋ ce wowèe a ghoo nè bèe mo' vi gwesi ba wowèe.  
Jùu wowèe njo' yàp buu bbebep ce vi yu gòr,  
wowèe a tèe tu nè wè.

<sup>11</sup> Geewa'a, gè tɛ bɛ̀ wɛɛwɛ ce a sùrni njep wě tii a ce lu'shi,  
gee tɛ wowèe a ce yòp ce lu'shi.

Sàṅ wo bbàp tɛ'shi wowèe,  
tɛ bɛ̀ ce a kòṅ lo rlii a bo ce lu'shi nè wè.

<sup>12</sup> Oo Yawè, yi yu mini enɛ wɛ ke ghòni bɛ̀ ce a yu kùyɛɛ.

Wɛ ke ku'shi wowèe ne lo rbòṅntee àmbò a nè byɛɛbir wa'a.

# SÂM

## 6 Oo Yawè, jà' la ryòn

<sup>1</sup> Oo Yawè, fa lapni mè mbe nfè' ntee yi yaŋ wè ka',  
kè nàshi mè nè rshentee—ŋwè ka'.

<sup>2</sup> Oo Yawè, koosi mnse nè mè njobè' m ce sèpre.  
Oo Yawè gèe tɛ m ke'si njobè' wap bvup vi ce fa mè ŋgɛ'.

<sup>3</sup> La ryòn li yu foŋ à ŋgɛ' sê,  
oo Yawè, à be cu dù bà' fɛ ka' jà' mè?

<sup>4</sup> Oo Yawè, karse nyor ja' la ryòn,  
jà' mè njo' lo rkòŋni ce li yu nfesè.

<sup>5</sup> Àde' ŋwè ce e kwe wɛɛ, ker kuushi wè ka'.  
Dwè ce àde' e ce nèsi wè embà yìr a nda?

<sup>6</sup> Mè gùuŋger a sê,  
mè borsi wap bkuu nè mŋgoomir nètɔ' wɛɛwɛ,  
mè war a borsi ya mbuubkuu nè mŋgoomir enɛ jòp jòp jòp.

<sup>7</sup> Ma mmir mi jì're njobè' mlù.  
Ya ŋgã bbàa wɛɛwɛ a gèe mè war mmir mi ko'ŋgèr.

<sup>8</sup> Wèe wɛɛwɛ ce ŋgã ŋgèe buu bbebeɸ, lò nè efa mɛ mbùu,  
njobè' Yawè à yu' àmbò m ce war.

<sup>9</sup> Yawè à yu' la rwar,  
a beesi la rloo.

<sup>10</sup> Rètù yi be lò koo ya ŋgã bbàa wɛɛwɛ, tɛ yi fa wowèe ŋgɛ' sê,  
wowèe a be lò caŋ kuti nŋìnjì tɛ rètù yi koo wowèe mboo mboo.

# SÂM

## 7 Mè sùrni njep tii Yawè

<sup>1</sup> Oo Yawè yà Nyù, mè sùrni ba njep wě tii.

Jà' mè efa bèe ce a ce ròo ma m̀k̀k̀u wɛɛwɛ.

<sup>2</sup> Jà' mè fà dì' wowèe a sasi mè à btete à btete àmbò à sàsi burù' wa'a,  
te ñwè ke' ba ce e jà' mè ka' ka'.

<sup>3</sup> Oo Yawè yà Nyù, ka' ba enɛ mè gèe yuu bebep,  
ka' ba enɛ ma m̀m̀bo mi raa ka',

<sup>4</sup> ka' ba enɛ mè kusi ba yuu bebep nè ñkarà ce e gèe yuu bònbon nè mè,  
kè mè koo ba yuu ese yà ñwè bbàa à cici è,

<sup>5</sup> à gee te ya ñwè bbàa juu mè, koo,  
gee te e nyenshi mè njep nshè,  
sùñ ya fòo njep nfũnfũ.

*selà*

<sup>6</sup> Oo Yawè, nàti nè lo rshentee,  
nàti mbekì re fù'fù' ya ñgãa bbàa,  
nàti re nè mè, caasi rsa'.

<sup>7</sup> Gèe te b̀k̀ur bèe vi kaari àgee wè,  
te à sa' vi embe bùu.

<sup>8</sup> Oo Yawè, a wè ce wɛ ke sa' m̀nsa' bèe.  
sa' ma m̀nsa' àmbò wè yɛ enɛ m yu kùyɛɛ,  
ker ba àmbò wè yɛ enɛ mè rìñ yuu mo' ka'.

<sup>9</sup> Oo Nyù ce e yu kùyɛɛ! Wè ce wɛ ke taasi m̀ñkwà'shì ba m̀ntee bèe,  
gèe te buu bbebeb ñgãa bsarbuu vi vu àlùsimbùu,  
gee te bèe ce a yu kùyɛɛ a tɛɛ tatap.

<sup>10</sup> Nyù yu yà byɛɛbir.

E ke jà' bèe ce yap ntee yi yu kùyɛɛ.

<sup>11</sup> Nyù yu Nyù ce e ke sa' m̀nsa' kùyɛɛ,  
a ba Nyù ce e ke dùñshi yì nɛpntee à m̀nòñ wɛɛwɛ.

<sup>12</sup> Ɖwè à ka' tɛ bèŋger ka',  
banɛ Nyù be kuu yì kàafà',  
buu yì ŋguu, tami nyor àgho.

<sup>13</sup> E kupshi yì buu bìr nyu ŋwè nè ye,  
a tami nyor à rmà' mɲjɛɛ ce mor yi yu àgho.

<sup>14</sup> Yê, ŋwě bsarbuu e ke yeeti buu bbelep,  
koo rbà ce a ŋɛ',  
bi mnde'.

<sup>15</sup> E ke tuŋ bè'tè, yi coomì,  
kùti ker gwe ye njep bè'tè ce e tuŋ anà.

<sup>16</sup> Yì ŋɛ' ce e ke ròò nè bèè mo' e ke lò ku kùti ba nè ye,  
yi ŋěe ntambaŋ yi ke kù ce kùti ba nje yě tù.

<sup>17</sup> M be yòŋshi Yawè njobè' e ke gèe yì buu kùyɛɛ,  
m be yòp nèsi rlii Yawè ce e yu Tu mbendùu buu wɛwɛ.

# SÂM

## 9 M be suŋ àmbò buu bbèe ce Nyù à gèe

- <sup>1</sup> Oo Yawè, m be yòŋshi wè nè ya ntee wɛɛwɛ,  
m be suŋ àmbò buu bbèe ce wè gèe wɛɛwɛ.
- <sup>2</sup> M be yu' rbòŋ ce lu'shi nè wè,  
oo wè ce wè yu Mbendùu Buu Wɛɛwɛ, m be yòp nèsi lo rlii.
- <sup>3</sup> Ya ngăa bbàa a ye wè, kuti njinjì,  
kote, kwɛŋger à wě bsii.
- <sup>4</sup> Wè teni yà nsa' yeɛnì,  
wè cu mbe kàbàrà' a ce teni mnsa' kùyɛɛ.
- <sup>5</sup> Wè lapni bto', a gee ngàa bsàrbuu a kwɛŋgèr;  
wè siŋsi map mlii à nfesè ba à nfesè.
- <sup>6</sup> Yi ngăa bbàa yi mì nfesè, a siŋsi map mla' wàwà,  
a lese àmbò wowèe dùdù.
- <sup>7</sup> Geewa'a, Yawè à cu mbe kàbàrà' nfesè,  
E taa yi kàbàrà' a ce teni mnsa' yeɛnì,
- <sup>8</sup> E ce sa' tunshè kùyɛɛ,  
a ce sa' bèe à blo' ka'.
- <sup>9</sup> Yawè yu di' rsùrnì nè bèe ce bèe a ce nyù' wowèe,  
a ba di' rsùrnì mbe nfè' nge'.
- <sup>10</sup> Oo Yawè, bèe ce a rìŋ lo rlii a ce fa wap bfee nè wè,  
njobè' wè lèse bèe ce a ce ròo wè ka'.
- <sup>11</sup> Yòp sèe byɛɛ mèsì nè Yawè ce e cu mbe kàbàrà' mbe Sayòn!  
Sèe suŋ bto' buu bghagha' ce e gèe!
- <sup>12</sup> D̀wè ce e ke kusi mncucu' àtu bèe ce a yushi, à tur nfè' bèe anà,  
e ke fuse rwar bèe ce bèe a ce nyù' wowèe ka'.
- <sup>13</sup> Oo Yawè, koosi mnse nè mè!

Yε ηγε' ce bèe ce a bàa mè a ce fa mè.  
Oo wè ce wε ke fūr mè e kù cùu rkwe,  
<sup>14</sup> tε m bo ce suη buu wεεwε ce a vì ce a nesi wè àtu mo,  
m be ce lu'shi mbe bcùu ηka' boo e à rla' Sayòn<sup>a</sup> ene wè jà' mè.

<sup>15</sup> Bto' vi gwèηger njep bè'tè ce wowèe a m tuη,  
raa ce wowèe a mà' yi koo ba wowèe à mηkùu.  
<sup>16</sup> Yawè à gèe bèe a riη ye, e teni mnsa',  
taa ce bεe bbelep a lè' nè map mbo yi koo wowèe.

*selà*

<sup>17</sup> Bεe bbelep a be kè dù mba yir,  
àmbò bto' wεεwε ce a lèse Nyù a be kè dù nà.  
<sup>18</sup> Geewa'a, à be kè lèse mbuuyuu wèe à nfè' mo' ka',  
tε mηkwà'shì ηgãa fùp mi bu nfesè ka'.

<sup>19</sup> Oo Yawè nàti mbekì! Fa mà'shi tε yi ba àmbò ηwè à so wè wa' ka!  
Cuusi bto' mbe lùr kôr!  
<sup>20</sup> Oo Yawè, wεpsi wowèe!  
Gèe tε bto' a riη ene a ku ba ba bèe.

*selà*

---

<sup>a</sup>9:14 Rlii ene Sayòn na a rlii Jèrusalèm mò'.

# SÂM

## 10 Rloo ñwè ce bèe a ce jar nè ye

<sup>1</sup> Oo Yawè, wè tɛɛ ànjìsàp wa' njokɛ?

Wè sùrni mbe nfè' ñgɛ' njokɛ?

<sup>2</sup> Bèe bbebeɓ a ke jùu àmbù ñgã fùp nè nàanyor—ñwè tatap sê,  
gèe tɛ btaa ce wowèe a lè'shi vi koo ba wowèe.

<sup>3</sup> Dwě mbembep e ke nàa nyor à yuu ce yi ntee yi kòn,  
ñwè ce e ce bàṅ mmir à rkoni sɛ' cɛp Yawè ker ce kani ye.

<sup>4</sup> Dwě mbembep e ke ròo Yawè ka' njobè' e ce nàa nyor;  
mi mṅkwà'shì wɛɛwɛ mi ku ba ba enê, “Nyù yu àgho ka'.”

<sup>5</sup> Yì buu wɛɛwɛ e ke dù kùntombì,  
e ye wo mncir à yuu ka', vi ba ànjìsàp e nè ye.

À ka' ba àmbò yi ñgã bbàa wɛɛwɛ, e ke ñwàa wowèe ñwàa.

<sup>6</sup> E ke làa enjep yě ntee enê, “Àde' yuu mo' yi ke ci' mè ka';  
yuu beɓep yi be kè koni mè à nfè' mo' ka'.

<sup>7</sup> Yi cùu yi ruu ne mncɛp ba mmbo'ni, e ce wɛpsi bèe nè yi cùu,  
ñgɛ' ba buu bbebeɓ vi yu ye mbe tu rlee.

<sup>8</sup> E ke lè' bèe àmù mla',  
yushi bèe ce wowèe a gèe yuu ka' à bdi' sùti,  
E lò sɛɛsi mmir ce fyè' bèe ce a tur ñwè ce e ja' wowèe ka'.

<sup>9</sup> E ke nòn à bsùti, le' àmbò burù' ce e yu mbe bu' rɛṅ wa'a,  
e ke nòn wa'a tɛ e bo koo ñwè ce e tur ñwè ce e ja' ye ka'.  
E ke koo njèe ñwè anà njep li rraa, sùṅ.

<sup>10</sup> Dwè ce e buu yuu nà e ke gwè à nger ñwě ntatap cà, ñwè anà si'si ye,  
e buuṅgèr.

<sup>11</sup> Dwě ntatap anà e ke làa enjep yě ntee enê “Nyù à lèse,  
e sùti vi bsii, e ker ce ye ka'.”

<sup>12</sup> Oo Yawè, nàti mbekì, Oo Nyù nàa yo bo mbekì,

fa lèse bée ce bée a nyù' wowèe ka'.

<sup>13</sup> Ðwě mbembep à kani Nyù,  
a laa nè Nyù enjep yě ntee enê, “À be ghashi mè àtu mo ka'.” njoké?

<sup>14</sup> Geewa'a, wě Nyù, wε ke ye, njobè' wε ke ye ηγε' ba mlù ηwè,  
te à bo jà' ye, koo nsa' anà nje wě nyòr.  
Ðwè ce e tur ηger ka' à fa yì nyor nè wè,  
Wε ke jà' muu ηku.

<sup>15</sup> Kep rkoo ese ηwè bsàrbuu ce e yu ηwè ηgèe buu bbelep,  
ghashi ye àtu vi bsàrbuu wεewε caar te mo' yi beti ka'.

<sup>16</sup> Yawè yu ηkuu nfesè ba à nfesè,  
bto' ce a ce wεp ye ka' vi be bu embe yě ηgòη.

<sup>17</sup> Oo Yawè, wε ke yu' rwar bée ce bée a ce nyù' wowèe.  
Wε ke borsi wap mntee, fa tù' nè wowèe

<sup>18</sup> te à bo rè nè boo ηku ker ba nè bée ce bée a ce nyù' wowèe.  
Wε ke gèe wa'a fà dì' ηwè enjep ηgòη bo wepsi bée ka'.

# SÂM

## 11 Mè fa bfee nè Yawè

<sup>1</sup> Mè ke sùrni njeptii Yawè, yi yu njìnjì à rlàa nè mè enê,  
“Fèḡ àmbò siḡ wa'a du kù rtùu.

<sup>2</sup> Yè àmbò bēe bbeber a buu ḡḡu,  
wowèe a fa map mḡḡe nje kù,  
tè a bo mà' à tù'nji tè mi koo bèe ce a yu kùyeḡ enjèp ntee.

<sup>3</sup> A ka' bepsi bkùu,  
àde' bèe ce a yu kùyeḡ a gee yap e ke?”.

<sup>4</sup> Yawè yu mbe yì ndap ce e yu nrara,  
yi kàbàrà' yi ba mbe bùu,  
mi mmir mi ke yè buu, e ce tuḡti mmir mbenndùu bèe.

<sup>5</sup> Yawè e ke sàr mntee bèe ce a yu kùyeḡ,  
geewa'a, e bàa bēe bbeber ker ba ḡwè ce e kòḡ ḡḡe ntambaḡ.

<sup>6</sup> Yawè be cù' mncermor mbendù bēe bbeber,  
fa wowèe ḡḡe' nè mor ba mḡkàḡ ce mi ce she ker ba fu' ce yi ce tònì ce yi  
ḡḡete nè wowèe.

<sup>7</sup> Yi be ba wa'a njobè' Yawè yu kùyeḡ,  
a koḡ mnfà' ce mi yu yeḡnì.  
Bèe ce a yu kùyeḡ a be kè yè vi bsii.

# SÂM

## 12 Ngàa mini a ker ba à mù bèe ka'

<sup>1</sup> Oo Yawè, jà' wèr, njobè' ηwè kèr ba ce e ce wεp wè ka',  
ngàa mini a ker ba à mù bèe ka'.

<sup>2</sup> Dwè wεwε ku ye ba rlee nè nfur mò',  
wowèe a ce de' nè cùu mbo'ni, a ce làa nè ntee bbaa.

<sup>3</sup> Yawè, ceeshi bcùu mmo'ni wεwε,  
tee rlee ce li ce nàa nyor sê,

<sup>4</sup> ce làa enê, “Wèr be so nè mi mlee,  
wèr a tur yer cùu, ηwè ce e yu masà mbe wër ndùu a nda?”

<sup>5</sup> Yawè à làa enê, “À ka' ba njobè' bèe a ce fàpshi buu ese ηgãa fùp, ηgãa mbuu  
yuu a ce warηger,  
m be nàti sè'ni, lè wowèe mbe dì' rfutè ce yi ghεete nè wowèe.

<sup>6</sup> Blàa Yawè vi yu brara,  
àmbò silvà ce a tòo ηjep mor nlàa enjep nshè wa'a,  
ce a gèe bkàη sàamba e raa wa'a.

<sup>7</sup> Oo Yawè, a wè ce à be kè' à bèe ce bèe a ce nyù' wowèe,  
à be te'shi wèr efa ηgũ mbembep ca nfesè.

<sup>8</sup> Bèe bbebepe a ce càaca à bdi' wεwε,  
bèe a ce vuse ba ηgèe bebepe.

# SÂM

## 13 Oo Yawè, à be cu nyan bà' fè?

<sup>1</sup> Oo Yawè, à be cu nyan bà' fè? À be lèse mè nfesè a?

À be sùti wo bsii ese mè dù bà' à se'kè?

<sup>2</sup> M be kù ce rè wèr ma mḡkwà'shì

te ntee yi ku ce fa mè ḡge' à nòḡ bìi dù bà' à se'kè?

Yà ḡwè bbàa be so mè dù bà' à se'kè?

<sup>3</sup> Oo Yawè yà Nyù, fyè' ka mè beesi mè,

gèe te mmir mi raa mè, fà dì' m lo kù kwe àmbò mè buumi buumi wa' ka'.

<sup>4</sup> Fa mà'shi te yà ḡwè bbàa laa enê, “Mè so ye”,

te bèe ce a ce ròo ma mḡkùu a lu'shi enè mè ḡwè ka'.

<sup>5</sup> Ka' yi yu wa'a, mè fa bfee nje lo rkòḡnì ce nfesè,

ya ntee yi be ce lu'shi enè wè jà' mè.

<sup>6</sup> M be yòp nè Yawè,

njobè' e gèe bònboḡ nè mè sê.

# SÂM

## 16 Nyù be mà' mè ka'

- <sup>1</sup> Oo Nyù, te'shi mè,  
njobè' mè sùrni njep wě tii.
- <sup>2</sup> Mè làa nè Yawè enê, “A wè yà Tatâ,  
mè tur yuu bònbon mò' caa efa wè ka'/ce yi buu efa rlò ba ese wè ka'.
- <sup>3</sup> À ka' ba yi àmbò bèe Nyù ce a yu à ngòn ca, a bèe ce a yu yeenì sê,  
mè ce yu' rbòn nè wowèe sê.
- <sup>4</sup> Dge' bèe ce a ce jùu àmbù nyù mò' be kyèsi kyèsi,  
m be kùr wap btaṅshì blee,  
kè yòn rlii yàp nyù anà ka'.
- <sup>5</sup> Yawè yu ṅwè ce mè ce à yà, a ba ṅwè ce e ke ghòni mè,  
la ryòn li yu mbe wě bò.
- <sup>6</sup> Ndèe ngòn ya yi gwè mbe dĩ' yeenì,  
nè minì—ṅwè mè tur bti' ce vi bòn sê.
- <sup>7</sup> M ce nèsi Yawè ce e ke fa mè ncep,  
ya ntee yi ke cep mè, ka' nètù'.
- <sup>8</sup> Mè riṅ ené Yawè e ke kù ce ba wèr ye à nfè' wèewè.  
À ka' ba njobè' e yu à ya bo mà', yuu mo' yi be kè cì' mè ka'.
- <sup>9</sup> Yi ka' ba wa'a, ya ntee yi ce lu'shi, mè ce yu' rbòn,  
m be cu ce wep yuu ka'.
- <sup>10</sup> Yi be ba wa'a njobè' à be mà'shi mè mbà yir ka',  
kè mà'shi te yò ṅwě nrara bute ka'.
- <sup>11</sup> Wè gèe mè riṅ àmbò àde' m cu,  
mè ke ba à wě bsii, ruu nè rlu'shì—ṅwè,  
rbòn li ba a wě bo mà' nfesè.

# SÂM

## 17 M yu njeptii rlènshi bbàp Yawè

<sup>1</sup> Oo Yawè, yu' la rwar, sa' yà nsa' kùyye, yu'shi la rwar,  
ta tù' yu' la rloo ce li ce fũ ba ekù cùu mmbo'ni ka'.

<sup>2</sup> A wè ce à be teni yà nsa' yeenì!  
mà'shi te mo mmir mi ye yuu ce yi yu yeenì.

<sup>3</sup> Wè taase mè, a sar ya ntee nètũ,  
wè taase mè, à be ye yuu ka'.

Mè faa ene m be làa yu bebep ka'.

<sup>4</sup> À ka' ba yi àmbò buu bèe a ce gèe,  
mè kani ya à rgèe ngèe ntambaŋ àmbò wè làa.

<sup>5</sup> M ku ce jèr ba njep wo mnduunji/bcènji,  
mè be fũ enjo ka'.

<sup>6</sup> Oo Nyù, m ce ke' wè njobè' à be bèesi mè,  
ta yo tù' nè mè, yu' yuu ce m be làa.

<sup>7</sup> Dùŋshi lo rkòŋni ce nfesè à njè nji ce yi yu jee,  
oo Ìwè Rjà' nè bèe ce a ke sùrni ese yap ngàa bbàa à yo bo mà'.

<sup>8</sup> Kè'ni mè àmbò m yu yò mbàŋ lir wa'a,  
sùti mè njeptii rlènshi wo bbàp.

<sup>9</sup> Sùti ese bée bbebep ce a gèe ngèe ntambaŋ nè mè.

Ya ngàa bbàa a gàn mè a ce tà' yũ yũ.

<sup>10</sup> Wowèe a ke koosi mnse nè ñwè ka',  
ce làa buu nè nàanyor—ñwè.

<sup>11</sup> Wowèe a gàn bdì' ce wèr ce jèr sè'ni,  
a ce fyè' nji te a bo mà' wèr njep nshè.

<sup>12</sup> E yu àmbò burù' ce e ce ròo yuu à rsàsi wa'a,  
a ba àmbò muu burù' ce e sùrni a le' yuu wa'a.

<sup>13</sup> Oo Yawè, nàti re ye, so ye,

fur mè ese ηwě mbembep nè yò kàafà'.

<sup>14</sup> Oo Yawè, fur mè ese bèe enjep ηgòn ce yap di' yi yu ba njep ηgòn na nè yo bo.

We ke ruusi map mmbà nè buu bbònboη.

Wowèe a tur boo yi ghèetè wowèe.

Wowèe a ber yàp buu nè boo wap.

<sup>15</sup> A ka' ba yi àmbò mè, m be kè ye wo bsii njo' m yu kùyee, yi ba mbe nfè' ce mè lé', te m ye wo bsii te yi ghèetè mè.